

Izesu Kilistoni Gakó Lamaná Makí Luhuva Gizamó

Nagamí holokimiaká ve Zoní Izesuni gapo veletamó

(Mat 3:1-12; Luk 3:1-18; Zon 1:19-28)

¹ Izesu Kilistó Ómasímini gipalamú gakó lamaná nene lá oko apí imó neve. ² * Nenémini gakoláa Ómasímo gipala lo ami gakó nene Ómasímini agepagutí gakó loaká ve Isaiá láa loko luhuva gizamóma neve:

Gelezo, není gakó lo keme keme iti ve amiselekugo,
áisi ale goí oko voko kigikagú hoza alitanimó
nenémini gapoga veletative.

³ * Mikasi gomopalaló ámina vémo gakó napagutí láa loko nolive:

Guivahanimú nene likigika ali hee litalo.
Likigikagú limiti gapo ali hee litalo.

⁴ Ámina gakó Zonitoka okago eza mikasi gomopalaló vo anitimó nene vegená makó eza noitoka ali nupa ikago likigika ali viligiiki nenémini mogona utó itive liki monó nagamí hilitamó nene Ómasímo lihimatini ahuloleketative loko lo utó oko lo kemeko minamó. ⁵ Lá okago, Zelusale numutokatí itó Zutaia apá makotokatí nene mukí vegená Zoní noitoka vake lihimáini li utó ikago, Zota nagamikú monó nagamí holoketamó.

* **1:2:** Mal 3:1 * **1:3:** Isa 40:3

⁶ * Zoní nene Ómasímini agepagutí gakó loaká ve Ilaizakitana oko kamele iza zopovatumú lilí a gó luhoake, itó iza galupavatumú lilí a holotani nene gohalaló zeake, ganuki himoni nogozagigó noko minamó. ⁷ Noko minake, láa loko lo utó oko lo kemeko minamó: Nemegealoka noa ve aí zámuzá nenémo není zámuzá nivilegekave. Nénisi ánéámina aí lelegitó minamunazo, hoza lagasó aletoko aí gasa gó ate akisitomó nene etaminogo ive. ⁸ Nénisi nagamikó nohololeketumóza, áisi nene Ómasímini Sikalahú hololeketanogo ive, loko lo kimimó.

Izesú monó nagamí holamó

(Mat 3:13-17; Luk 3:21-22)

⁹ Gamena nene zupa Galilaia mikasigú nene apá makó minamó, agulizá Nasalete. Izesú nenelotí Zoní noitoka anitekago Zota nagamikú monó nagamí holotamó. ¹⁰ Holomikago, nagamikutí iteake ánígamó nene, okulumá koló okago, Ómasímini Sikalahú nene nama luhusigitana oko Izesuni amupiló nolimigo ánígamó. ¹¹ * Lá okago okulumakutí Ómasímo gakó makó láa loko limó: Geza nene nigika amenou gipáne noane. Geí áního lamaná okuve.

Satá Izesuni amekú moloko minamó

(Mat 4:1-11; Luk 4:1-13)

¹² Loko lokago Sikalahulímo Izesuni amiselekgago mikasi gomopalaló vimó. ¹³ Neneloka voko noigo, gamena 40-a oko novigo Satá nene gimivagú moloko minamó. Itó Izesú eza nene hela

* **1:6:** 2 Kug 1:8 * **1:11:** Apí 22:2; Age 2:7; Isa 42:1; Mat 12:18; Mak 9:7

gaha namatini holúikú noigo ageló keza nasahilí itiki minamó.

Galilaia mikasiuka Izesú monó hoza apí imó
(*Mat 4:12-17; Luk 4:14-15*)

¹⁴ Lá okago, Zonini nene nagá numukú ahulimikago noigo, Izesú nene Galilaia mikasigú vo aniteake Ómasímini gakó lamaná lo utó oko láa loko lo kimimó: ¹⁵ * Gamena mota alitokaze, Ómasímo gizapa oleketati gamena nene omo alitokave. Nenemú likigika ali viligiiki gakó lamaná gili alévolé ilo, loko limó.

Izesú lagaha aliaká ve losive losive sele lo kimimó
(*Mat 4:18-22*)

¹⁶ Nominake Galilaia nonohuló agataloka mohona noigo Saimoko agunala Etuluko keza lagaha miliaká asi ve minasinazo, nonohulukú nene lagaha gotaha ahuliki minasimó. Lá niasigo ánigoake Izesú láa loko lo kimimó: ¹⁷ Némegetiki alizo. Lagaha hoza aliki minasimóma, vegenatoka hoza nalisiko vegená není zuha lilí itave loko lekelémo nomuluve. ¹⁸ Loko lokago, litá iki lagaha gotahama ahulikasike ámegetiki vasimó. ¹⁹ Lá ikasigo Izesú koma makó novike Zepetaioni gipala lositá Zemusiko agunala Zoniko keza nagamikú lapegú minasike lagaha gotaha ali lamaná niasigo, ánigoake, ²⁰ sele lo kemekago, gilikasike, améipini Zepetaiogegi gelekelé izegipalagi lapegú niago ahulikimikasike Izesuni ámegetiki vasimó.

* **1:15:** Mat 3:2

*Holosi golesa agikagú mina ve
(Luk 4:31-37)*

²¹ Lá okago, keza Kapanao numutoka viki anitiake holisi gamena alitokago, Izesú nene monó numukú iteko monó lo kimimó. ²²* Lo kemekago, gilikago, itimó. Monó mogona apí ikimiaká a vete gakó lainim oketamó nenéminoko apí oketamimó. Ezáa monó gakola gale geheko lo kemekago, gili-ake sigaga sagaga litamó. ²³ Lá okago, gamena nene zupa monó numukú ve makó minamó nene agika ale gopa i holosi agikagú minamó. ²⁴ Eza gamoga geko Nasalete ve Izesuvo, geza nana netá golesa aleletanogo noane. Géisi lelémo golesa itove loko noape. Geí ánigo hee hee noluve. Géisi Ómasilokatí etó oko noani vema noane. ²⁵ Loko lokago, Izesú nene gahá amike gegepa apizeoko agikagutí iteko legesó oko vozo. ²⁶ Loko lomikago, agika ale gopa i holosi nenémo ale helonalo lomikago, gopaga nolike agikagutí iteko ahulomiake vimó. ²⁷ Lá okago ve vená mukí keza ininá ake kezáitoka loká loká ake lamó: Íi, imane nana suni neve. Monó nene haitolímini amuzavagi neve. Áisi gakola gale geheko holosima lokimikago gili amiaká niave. ²⁸ Liki likago, aikumú gakoláa likago litá oko Galilaia mikasiuka puu loko vimó.

*Izesú Pitani venalámini izolahini alémo zokamó
(Mat 8:14-15; Luk 4:38-39)*

²⁹ Lá okago, monó numukutí limiake, Saimon itó Etulú keí numukú Zemusigegi Zonigegi itemó. ³⁰ Saimoni venalámini izolahini agupegú ló la netá avisekago akonoigo, Izesuni litá iki li amemó. ³¹ Li

* **1:22:** Mat 7:28-29

amikago, vo aniteake agizató aleko alémo otekago, agupegú ló la netá nenémo litá oko asú omikago, oteake Izesugini nasahilí oketamó.

*Ho lemekago Izesú vejená mukí kelémo zokamó
(Mat 8:16-17; Luk 4:40-41)*

³² Lá noigo, únaká ho lemekago, mukí kivisi vejenaki kigikagú holosi golesa mina vejenaki Izesutoka kilímiki ikago, ³³ apá amelage mukí iki gatetó alegesá amó. ³⁴ Lá ikago, haitopaitó netá kivisi vejená mukí kelémo zokoake holosi golesa mukí nene kigikagutí kepeleko kimisilimó. Lá itó nene ángi hee hee likanazo, aí mogona lili ali amitave loko lo hukoketamó.

*Izesú monó lo kemeko mohona imó
(Luk 4:42-44)*

³⁵ Gó lomolomo gokululuva notovo igo, línnumuvamú Izesú eza numukutí lemeake apá makotoka mikasi gomopalaló voko minake Ómasiloka limó. ³⁶ Lá noigo Saimon nene agivelagegi keza agizaka hiziki, ³⁷ alími utó iake láa liki li amemó: Vegená mukí geikumú vitagá niaze, geza imaneló nana noane. ³⁸ Liki likago, eza láa loko lo kimimó: Apá mukí vaí oko alitoka neve. Neneló monó lo utó itove loko makó vitune. Neza nene ámina hoza alitove loko omo nouve. ³⁹ * Loko loake vike Galilaia mikasiuka mohona o asú noiike, keí monó numuni minakú minakú monó lo utó oko minake, holosi nene kigikagutí kepeleko kimiseleko alahula ahula imó.

*Izesú lokago halamé gizali ve gililimó
(Mat 8:1-4; Luk 5:12-16)*

* **1:39:** Mat 4:23, 9:35

⁴⁰ Lá okago, halamé netá gizali ve makolímó aitoka oake negénegeka loko alapusa hizike lo amike limó: Geza nene nelémo gililitove loko nene hanuva nelémo gililitanimó nenazo, nelémo gililitane loko noluve. ⁴¹ Loko lokago, Izesuni agika hizekago agizani lutoko agupeloka ale nogi-like lo amike limó: Gililitane loko gelekuze. Gilelezo. ⁴² Loko lokago, litá oko halamé netáma asú omikago agupe lamaná okago, ⁴³ Izesú litá oko namisilike lo hukotake limó: ⁴⁴ * Gelenape. Geza imane gakó avetó oko vejená lo kememo. Gilelekane liki gili hee litave loko geza nene voko guguni gizoaká ve gugupe alapizekako mota gilelekane loko ánigative. Itó gilelenikumú nene Mosé loleketa netá Ómasi guguni gizo amitive loko amekako eza vejená mukí lo kemekiko nenémini mogona gili vevesatave. ⁴⁵ Loko lokago, ámina ve nenémo voko avetó avetó oko lole ale imó. Nenemú Izesú nene vejená sii sii liki alegesá ikatave loko taoni makotoka hanuva vamike apá agat-aloka minokago, vejená keza numutó namatotí gopa aitoka ikigó minamó.

2

Izesú ve gepili alémo zokamó (Mat 9:1-8; Luk 5:17-26)

¹ Gamena makó oko vokago, Izesú nene Kapanao numutoka goha vo anitekago, Izesú nene numukú noive liki gakoláa giliake ² vauva aliki iki alegesá akumú gatetoki hizi lí amó. Lá okago, monó lo nokimigo, ³ ve losive losive nenete ve

* **1:44:** Liv 14:1-32

gepili makó ukoakoló aliki niago, keitoka vegená makó kémegetiki amó. ⁴Lá ikago vegená giki ikago, Izesuni amatoka amitamó okago numupitó itinigi ukoakoló milimiake akaló aliki itemó. Izesuni gotolaló ali koló iake, ve gepili mina ukoakoma nagá ziki ahulikago Izesuni amatoka limimó. ⁵Lá okago, Izesúma gili alévolé amó nenémini mogona ánigoko geleake ve gepilima láa loko lo amimó: Gipáneve, lihimaka ahulogimikuve.

⁶Loko lokago, monó mogona apí ikimiaká ve neneló minamoláate láa liki kigikatunú gelemó: ⁷Íi, Ve makó éaho lihimate ale ahuloletatimó neve. Ómasi hamokó lihima ale ahuloaká noimó nenazo, eza agupe aleko iteko Ómasi aviliginogo nolihe. ⁸Láa liki kagata nigelego, Izesú nene Zuta vegenalite lihima ahulolimiaká itó vegená kelémo zokoaká nene Ómasímogó loló oaká netá neve liki gelemó nene hanuva agikatunú geleake láa loko lo kimimó: Likigikauka gakó nenémináa nanamú nigeleve. ⁹Ve makolímo Ómasi noamitimó nene lihimaka gilatogimikuve loko vávani oko lamitimóza, ámináminoko kelémo zokoaká zámuzagi ve noamitimó nene oteoko ukoakoka geheko vozo loko litá oko lo ameminogo ive. ¹⁰Lá onoimóza, okulumakutí lumu ve gihila neza mikasigú nene lihima gilatoakalímini zámuzá itó vegená kelémo zakoakalímini zámuzá nenitoka neve liki gili hee hee litave loko ve gepilima lo amike limó: ¹¹Oteko ukoakoka geheko numukaloka vozo loko nologetuve. ¹²Loko lokago, galinali kogovisaló ukoakoma geheko vimó. Lá okago, vegená mukí keza sigaga litake Ómasi

agepoka láa liki lamó: Nene suni ánígosá amuhá gosohá utó okago ánígokune, liki lamó.

Livaini sele lo amimó
(Mat 9:9-13; Luk 5:27-32)

¹³ Izesú lá oake goha lemeake nonohuló agat-aloka vike vejená mukí aitoka alegesá ikago monó apí o kemeko minamó. ¹⁴ Nenelotí novike, Alapaioni gipala Livaí nene takisi aleaká numukú noigo, áníhoake némegetoko ano, loko lokago, Livaí nene oteake ámegetoko vimó.

¹⁵ Vike Livaini numukú itiki minasike nosánetá ninasigo, takisi moni aliaká vegi golesa netá aliaká niave liki kagata giliaká a ve makoláagi mukí keza Izesuni ámegetiki viaká a ve minamó. ¹⁶ Lá niago, Palisaio monó vegenalitinini monó mogona apí ikimiaká ve nenete Izesú nene ámina ánigi goselé iaká vegenaki nosánetá ninago ánigiake nene, izegipala zuha láa liki li kememó: Íi, áisi nene golesa netá aliaká vegená nenémináagi nosánetá nana igo nonave. ¹⁷ Liki likago, Izesú nene geleake anoza gakó makó láa loko lo kimimó: Keza ha minamoláate lusa vemú sele lisá amave. Kivisi vegenalitegó lusa vemú sele liaká niave. Neza hee loko nune liki liaká nia vegená kelémo otopá zitove loko lememumóma neve. Neza lihimáinigi vegená kelémo otopá zitove loko lumumóma nena, loko limó.

Nosánetá mosekakumú loká itamó
(Mat 9:14-17; Luk 5:33-39)

¹⁸ Zonini izegipala zuhagi Palisaio monó vegenaki keza Ómasímo nosánetá mosekuko lelikumú litihe liki mosé mosé iaká amó. Lá niago, ve

lugáa keza Izesutoka vake láa liki loká itamó: Zonini izegipala zuhagi Palisaio monó vegenali-tini izegipáini zuhagi keza nosáneté mosé mosé iaká niamóza, geí izegipaka zuha keza mosisá amave. Nanamú neve. ¹⁹ Liki likago, Izesú anoza gakó láa loko lo kimimó: Ve makolímo agivelagegi makó kogoliza viziki minata zupa nene keza aikumú miluma giliiki nosáneté mositamó nehe. Lá oko nomive. Ámina vegi apiziki minata zupa nene nosáneté moseminigave. ²⁰ Ámina vema apili hilita zupa alitokiko, nene zupa miluma nigiliki nosáneté mosinigave. Áminámini iki, izegipáne zuhate alika nenikumú miluma giliki mosí mosí inigave. Itína nene moseminigave.

²¹ Itó lavolavo gó gosohá gí zenamimó nene huki koma iiki alí litaha lavolavoló miliki akotísá amave. Alika nagamí zikiko gikí okiko nene gosohá gó komamámo litaha lavolavoma-lotí hikelekiko lavolavoma golesa o asú inogo ive. ²² Itó vain nagamí gosohá gituhú galakalá noigo nene litaha getununigú milisá amave. Vain nagamímámo giputooko getununima zeko pulutokiko vain nagamíma hutilí okatize, itó getununima ámina oko golesa okatize. Vain nagamí gituhú galakalá noimó nene litaha getununigú negopa gosohámagukó miliaká niave. Loko anoza gakó limó nene Zuta vetini litaha mogonáagi Izesuni izegipala zuhate gosohá iki miliki ita sunigi molo apizeakaláa nomive loko limó.

*Izesuni vegenala zuhate holisigú kilé hisiki nimi
vamó
(Mat 12:1-8; Luk 6:1-5)*

23 * Holisi gamena makokú Izesuni izegipala zuhagi kilé mikú mihina niago, izegipala zuhate gaúna hilikago kilé asutiake gihiláa hisiki nimi vamó. 24 Lá niago, Palisaio monó veenalite gili golesa ake Izesuni li amiki lamó: Ánigozo, netá nalemo nenémo golesa okave. Lelí holisigú imane hoza lá amoakalímini nene nanamú naleve. 25 * Liki likago, eza monolímini li hukina gakó nenémo vejená kelémo vatí iti gapo nene hize lí itive loko utó amive liki gilitave loko láa loko lo kimimó: Gozapá agulizaki ve Tevitige vejenala zuhagi nosánetakumú gaúna hiliake netá alemó nene monokú luhuva gizinamóza lekeza ámina gakó gatiake mogonáa gelemiki nilahe. 26 * Tevití eza Ómasímini numukú itekago guguni gizoaká ve napa Apiatalá nene Ómasímini avogisalo mila peleti amekago noake ezagi makó mina vejená nene kemeko namó. Ámina peleti nene hanuva veenalite namitave liki guguni giziaká vetegó natave liki alévolé iki li hukinamó nene gopa namó neve. 27 Loko loake, miní ameko láa loko lo kimimó: Holisi gamenamule loko Ómasímo vejená loló amimóza, holisi gamena nene vejenakumule loko utó onomó neve. 28 Lá onoinazo, okulumakutí lumu ve gihila neza holisi amelahina nounazo, izegipáne zuhate holisi gamenagú lilí ita netá nene není netá neve, loko limó.

3

* 2:23: Gapo 23:25 * 2:25: 1 Sam 21:1-6 * 2:26: Liv 24:9

*Agizani nakeseta ve
(Mat 12:9-14; Luk 6:6-11)*

¹ Minoko monó numukú nene agizani nakeseta ve makó iteko noigo, Izesú áminagú goha itekago, ² holisimagú nenazo, ámina ve imane holisimagú hoza aleko alémo zokokikoma goní otatunize li-ake gizapa iki minamó. ³ Lá niago, Izesú nene agizani nakeseta vema láa loko lo amimó: Holutegú ote minozo. ⁴ Loko loake vegená láa loko loká oketamó: Holisigú nene netá lamaná alesatímo etatihe netá golesa alesatímo etative. Vegená kelémo lamaná osatímohe kepele helesatímove. ⁵ Loko limóza, anotó alemake niago, izapaló molago gonú nokipilike gili ámegekumú miluma geleake, agizani nakeseta vema gigizani lutozo loko lokago, agizani lutokago goha lamaná imó. ⁶ Lá okago, Palisaio monó vegená keza limiki vake nana oko apele hilitune liki kezagi Heloteni patigú vegenaki litá iki lova gizamó.

Nonohulotó vegená iki mulusi milamó

⁷ Lá okago, Izesú eza izegipala zuha kelémoko nonohulotó lemekago, vegená mukí Galilaia mikasilotí kémegetiki vamó. Itó kéisigó vamamó. ⁸ Zelusalegatí itó Zutaia apakú numuni apá makotokatí itó Itumaio mikasilotí itó Zota nagamí vola helegalotí itó Tulo numutokatí Sitona numutokatí vegená keza iki Izesú oko moloko imó nenémini gakoláa giliake vaí iki aitoka alegesá amó. ⁹ * Lá ikago, Izesú alegesá iki mina vegená aitoka mununú ikatave loko izegipala zuhate nagamikú lape makó aliiki nagamí

* **3:9:** Mak 4:1; Luk 5:13

getatoka milikiko nenegú iteko minoko gakó lo kimitove loko loketamó. ¹⁰ Vegená mukí kelémo zokamómave liki netá golesa gizale vegenalite agupeló ale gilitunitímo lelémo zokative liki aitoka iki mulusi milakumule loko lapemú limó. ¹¹ Lá okago, holosi golesa kigikagú mina vegenalite ániga zupa kighúna giki gamoga giki géisi Ómasímini gipalama noane liki liaká amó. ¹² Láa liki likago aí mogona aveté iki lili ali amitave loko alévolé oko lo hukoketamó.

*Izesú ve 12 hozaló ve kelémo molamó
(Mat 10:1-4; Luk 6:12-16)*

¹³ Izesú nene zopegaló iteake agikatunú gili vegená sele lo kemekago aitoka viki alegesá amó. ¹⁴ Lá ikago, ve 12-a ezagi minatave loko itó kimiselekikiko monó gakó li kimitave loko ¹⁵ itó zámuza kemekiko kigikagú holosi minatamó kipiliki kimisitave loko kelémo etó oake kugulizá nene aposolo vemave loko molamó. ¹⁶ Ve 12-a nene lá iki minamó: Kugulizá Saimon, agulizá gosohá Pitani molamó, ¹⁷ itó Zepetaioni gipala Zemusí itó agunala Zoní, keza nene kugulizá Poanelekesi loko molamó, lelí gakokutí nene gó hegeaká ve. ¹⁸ Itó Etulú itó Pilipó itó Patolomaió itó Mataiό itó Tomasí itó Alapaioni gipala Zemusí itó Tataiό itó Saimoná eza Loma vemú giligo ahulanogo i ve, ¹⁹ itó Kaliotó numutotí ve Zutá eza minomo iteko Izesuni amimika limó.

*Izesuko Pelezepuloko
(Mat 12:22-32; Luk 11:14-23)*

²⁰ Izesú nene aí numutoka vimó. Vo anitekago vegená vaí iki alegesá akumú nosáneta namamó.

21 Lá ikago, Izesuni vejenala zuhate áisi negi hizekave liki la gakó giliake, agizató alitune liki vamó. 22 * Lá ikago, monó mogona apí ikimiaká ve Zelusalegatí a ve keza Izesunimú láa liki lamó: Holosi golesa makó agulizá Pelezepuló nene agik-agú noive, itó holositini agulizaki vémo alémo vatí igo holosi nene kepeleko kimiseleaká noive. 23 Láa liki nila gakó Izesú nene geleake sele lo kemeake Satani zámuza mota avilegeneikumú anoza gakó makó láa loko lo kimimó: Íi, Satá ezáa izegipala zuha kepeleko kimisilitihe. 24 Mikasi makokú vejená hizi hoú latamó nene, alévolé iki minamiko ámina apatoka gámekokó pizinogo ive. 25 Itó hamó zuha nenete hizi hoú latamó nene, ámina vejená alévolé iki minaminigave. 26 Lá onoinazo, Satá nene ezáa vejenala zuhagi hizi hoú latamó nene, voko alévolé oko minamitimó nenazo, tolova inogo ive. 27 Itó ve makolímó gasovagi ve amuza vémini numukú litá oko iteko aí henoni mukí ipá oko aleakaláa nomive. Goí oko ámina vémini agisa agizató nagá aleoko alika nene iteko alitimó neve. Lá oko nagá aleoko alika iteko henoniva ipá inogo ive loko limó nene Satani agizató nagá aleuke holosiva nene kepeleko kimiseleaká nouve loko anoza gakokutí limó.

28 Loko loake, makó láa loko limó: Neza lamaná lo likimitoze, gililo. Netá golesa haitopaitó nenémini lihima itó, alivi letivi iaká nenémini lihimaavaláa nene Ómasímó hanuva ahuloaká gapo nemóza, 29 * ve makolímó Ómasímíni Sikalahukumú alevo letovo oakaláa nene Ómasímó

* 3:22: Mat 9:34, 10:25 * 3:29: Luk 12:10

nénémini lihimáa apasoakaláa nomive. Ámina lihima ámina vémini amupiló mino lúaló moloko minanogo ive. ³⁰ Loko limó nene Ómasímini Sikalahulímini zámuzatunú negopa, holosi makolímo Izesuni agikagú lemeko alémo vatí igo holosi nene kepeleko kimiseleaká noive liki lakumú nene láa loko Izesú lo kimimó.

*Izesuni izolahiki agunamotamolagi
(Mat 12:46-50; Luk 8:19-21)*

³¹ Izesuni izolage izegipa agunamotamolagi anitiake numuni hetoka aikumú sele lamó. ³² Sele nilago, alími vego iake mina vegenalite láa liki li amemó: Gelenape, izokage izegipa gugunamotamoka keza hetoka emane niake geikumú sele nilave. ³³ Liki likago, Izesú láa loko lo kimimó: Izónegini nugunamotamónemú nilahe. ³⁴ Loko loake, aitoka mina vegená nene gonú nokipilike láa loko limó: Ánigalo. Izónege izegipa nugunamotamóne imane niamole. ³⁵ Ómasímo li gakató gili amiaká nia vegená kéisi nene izónege nugunamotamóne niave, loko limó.

4

*Zuha netá atilí oaká vemú anoza gakó
(Mat 13:1-9; Luk 8:4-8)*

¹ * Izesú goha nonohuló agataloka monó lo nokimigo, aitoka vegená mukí keza sii sii liki alegesá ikago vegená gikí akumule loko nagamikú lapegú iteko minokago, lape nene nagamikú minokago, vegená alegesá amó mukí keza getatoka minamó. ² Minikago, Izesú anoza gakó

* **4:1:** Luk 5:1-3

haitopaitolímini lo nokimike makó láa loko lo kimimó: ³ Gililo. Zuha netá atilí oaká ve makolímo netá gihila atilí inogo vimó. ⁴ Mikuka atilí omo novigo, gihila makó gapoló alemó zekago, gaha namate ake ni asú amó. ⁵ Makó nene gehani amupiló mikasi lagasó netó lemekago mikasi hána nomimó nenazo, goloakaláa litá oko golokaha, ⁶ ho nolake avagugu vizekago, luhusa hána minamike osagava vizimó. ⁷ Makó nene lilihámini luhusa nene mikasigú ha netó alemó zike golokago, liliha nenémo goloko iteake zemikago gihila zemimó. ⁸ Makó nene mikasi lamanakú lemeko minake goloko iteko gihila zimó. Zava makó nenémo gihila 30 zimó, makó nenémo gihila 60 zimó, makó nenémo gihila 100 zimó. ⁹ Lakagatagi minatamó neneta imane gakó gili hee liki gililo, loko limó.

*Anoza gajokú lo kemeaká itímini mogona
(Mat 13:10-17; Luk 8:9-10)*

¹⁰ Vegená lugáa vi asú ikago, aitoka mina vegenaki izegipala zuha 12-a kezagó minake ámina anoza gajokumú loká imikago, ¹¹ láa loko lo kimimó: Ómasímini gasovaló minoakalímini asuguná gakó lekeza gilitave loko lonoimóza, hetó niamoláa keza anoza gajokukó gilitave loko loaká nouve. ¹² * Nenemú Ómasímini agepagutí gakó loaká i ve Isaiá gakó makó láa loko luhuva gizonimó nene keitoka alévolé oko neve: Kogómulatunú ániagiakaláa ha ániगतamóza, ma ániagi vevesaminigave.

* **4:12:** Isa 6:9-10

Itó kagatatunú giliakaláa nene ha gilitamóza, gili vevesaminigave.
Kigika ali viligamikoma, lihimáini ahuloketamigo, ha minanogo ive.

*Zuha netakumú anoza gacolímini mogonáa
(Mat 13:18-23; Luk 8:11-15)*

¹³ Izesú miní ameko láa loko lo kimimó: Imane anoza gakó lumó nenémini mogonáa gelemahe. Lá noikoma, anoza gakó mukí nene nana iki gili vevesatave. ¹⁴ Netá gihila atilí oaká vémo monó nene atilí oaká noive. ¹⁵ Zuha netá makó atilí noigo gapoló alemó zimó nenémini iki minatamó keza monó gilitamóza, Satá litá oko aniteko monó nene kigikagú milikago minamó nene aleko vokago kigikagú minamimó. ¹⁶ Itó zuha netá gehani hizenei mikasiló limimó nenémini iki minatamó keza monó nigiliki litá iki laga kivisekago giliaká niamóza, ¹⁷ kigikagú luhusa ale gikitamigo gamena alínipa aliniko monó gakó alinakumú gopogu galatakalatá milikitata gamenaló nene litá oko akatimó neve. ¹⁸ Itó lilihagú limimó nenéminiki minatamó keza monó giliaká niamóza, ¹⁹ imane mikasiuka gena kepeleaká noi netá itó monimú lagava giliaká nia netalímo itó netá haitopaitokumú kumu heleaká noi netá nenémo kigikagú minoake, monó zemikago keitoka gihila utó osá amive. ²⁰ Itó mikasi lamanakú limimó nenéminiki minatamó nenete monó giliki alinago, keitoka gihila zeaká noive. Makolititoka napa otigí zeaká noive, makolititoka mukí zeaká noive, makolititoka vauva aleko zeaká noive.

*Liví legeakakumú anoza gakó
(Luk 8:16-18)*

21* Loko loake anoza gakó makó miní ameko láa loko lo kimimó: Ve makolímo liví lege molokoko holoma sepekú ahe somotunú gahumá oakaláa nomive. Eza liví moloaká holomaló molokago, hize hanatanogo ive. 22* Ámináminoko Ómasímini asuguná ne netá mino-loko vo tolova amitive. Minoko utó o asú inogo ive. Halá genei netá ámina oko hanato asú inogo ive. 23 Lakagatagi minatamó neneta gakó imane gili hee liki gililo.

24* Loko loake láa loko limó: Lekeza gakó imane nigiliki gili guni iki gililo. Lekeza gakó gilita polosava nene Ómasímo áminagó oko nene monó lehizeleketanogo ive. Itó nenegó nomive. Aleko iteko likiminogo ive. 25* Makó keza monó nene vatí iki gizapa iki ali minatamó nene Ómasímo goha miní ameko kiminogo ive. Itó makó keza monó nene lamaná iki gizapa amitamó nene monó alenoupe gilitamóza, goha ipá oko alekiko nene hanuva minatamó neve.

Zuha netakumú goloakakumú anoza gakó

26 Izesú gakó makó láa loko limó: Ómasímini monolímo likigikagú gihila ale utó itimómámini mogonáa lá oko neve: Ve makolímo mikú zuha netá mikasigú atilí oake, noike, 27 gó lana gó lana nominago nenémini mogonáa ánigo hee lamigo, zuha netáma goloko iteko napa noigo, 28 mikasímo ezáa lulu vizeake goloaká noive. Apí oko hosi oake goloko itike agila oake, gihila zeaká noive. 29*

* 4:21: Mat 5:15; Luk 11:33 * 4:22: Mat 10:26; Luk 12:2

* 4:24: Mat 7:2; Luk 6:38 * 4:25: Mat 13:12, 25:29; Luk 19:26

* 4:29: Zoe 3:13

Gihila zeake zuha lokago, aleko natuni gamena alitokave loake, hukatave loko kimiselekago minumuni aliaká niave.

*Masteti zuha netakumú anoza gakó
(Mat 13:31-32; Luk 13:18-19)*

³⁰ Gakó miní ameko láa loko limó: Ómasímini avogisaló vi hilata vejená hizi hutilí itakumú nene nanetalímini amupiló ale moloko litove. Nenemú litove loko nene nana gakotó anoza ale moloko litove. ³¹ Masteti loko nei zuha netá nenéminoko neve. Ámina netá nene mikasigú atilí inigi niago, mikasiuka gihila lugáagutí ezáa koma koma nemóza, ³² atilí ikago, goloko iteko iteko napa oake, zamú mukí kivilegeko izana napagi itekago, nama nenete samapalagú numuni giaká niave.

*Izesú anoza gakó mogonáa lo kimimó
(Mat 13:34-35)*

³³ Izesú anoza gakó haitopaitó mukí hamolíminoko monó lo kemeko minamó nene gilita polosava lo kimimó. ³⁴ Gakó lo kiminogo noike anoza gakokutikó lo kemeake, lo utó oko lo kememike ezagi izegipala zuhagi kezáikó minake nene, gakó mogonáa mukí lo utó oko lo kimimó.

*Izesú lokago una napa ahulamó
(Mat 8:23-27; Luk 8:22-25)*

³⁵ Ámina gamenalokó únaká gamena gánavaló nene Izesú eza izegipala zuhama vola helegaloka mota vitune, ³⁶ loko loake alegesá iki mina vejená ahulokimiake sipigú iteko noigo, keza alímiki nivago, vejená makolite nagamikú lape makokú kémegetiki vamó. ³⁷ Nivago una napa alekago, nagamí nene valahuká zitímo lapegú

lemeko vaí inogo noigo Izesú nene lape asevaló akonoike, gotolaló za moloko akonoigo, ³⁸ izegipala zuhate alími otiake láa liki li amemó: Monó gizapa velemaka, nagamikú simá nanogo nounize, geza nanamú lelikumú gele lememanike hanuva noane. ³⁹ Liki likago, Izesú oteake unama gahá amekake nagamí nonohuló nene valahuká zemoko legesó oko minozo loko lokago, una nene ha okago nagamí nene kii nolike zou limó. ⁴⁰ Lá okago, izegipala zuha láa loko lo kimimó: Nanamú lekelegesá ligive. Nenikumú velesá gili alévolé amahe. ⁴¹ Loko lokago, kehelele goha vizigo kezáini ligili hagili ake láa liki lamó: Agae, imane ve nene haitolímini neve. Unagi nonohuloki nene-tosa gakola gili alikasive, liki lamó.

5

Gelasa mikasiuka holosi golesa amisele ahu-lamó

(Mat 8:28-34; Luk 8:26-39)

¹ Nonohuló vola helegaloka viake, Gelasa ve-genalitini mikasiuka anitemó. ² Neneló agikagú holosi golesa mina ve makó minamó. ³ Ámina ve nenémo geha mulikú akoaká noigo, ve makolite agizató alisá ikago seni nagatunuki alemó nene alemimó. ⁴ Gamena gamena agisa agizató etoha iki seni nagatunú aliaká amóza, agizató nagá nene zeko halí oake, agisaló nagá alemó nene zeko hukokago, ve makolímo amuza moloko alémo zou lamitimó imó. ⁵ Gamena gamena únaká neteká

mulikuki agokaloki minake nene, gopaga loko minake nene, gehanitunú agupeva gesopá zeko minoaká imó. ⁶ Ámina ve nenémo Izesú nene sipigutí nolimigo geha mulikú gonosi apakú minakutí ake hototí Izesuni ángoake ololu loko oko Izesuni agisauka gupá ze amike ⁷⁻⁸ gamoga geko láa loko limó: Izesuvo, Ómasi napámini gipalamaka, géisi nana netá golesa loló onetanogo noane. Loko lokago, Izesú nene holosi golesa neneka, ámina vémini agikagutí iteko vamane loko lomikago, holosi nenémo amanapa ike neza Ómasímini agulizá noluze, miluma hoza nememo. ⁹ Loko lokago Izesú nene loká otake gugulizaka éagave. Loko loká omikago eza limó: Leza mukí nouninazo, lugulizá nene ami mulusi nouve. ¹⁰ Loko loake ámina mikasilotí limiselemitane loko negénegeka limó. ¹¹ Loko lokago, iza gululusi mukí zopegaló gale niki niago, ¹² holosite negénegeka lake izatini kigikagú limiselekako limitune. ¹³ Liki likago, gele kemekago, holosi golesa nenete agikagutí itiake iza gululusi tu tausen nenetini kigikagú itiake limikago, olíi miliake meiniló limiake nonohulukú limiki nagamí niki hutiake hiligesá amó.

¹⁴ Hilikago, iza gizapa vete golisi viake taoni napaloka iza gihiló numutokagi avetó iki li kimikago, vegená keza utó i netá ániganigi viake, ¹⁵ Izesutoka anitiake holosi agikagutí kimiselekago va ve nene ginegane ale luhoake geleakala lamaná okago, mitó noigo, ángiake kelegesá ligimó. ¹⁶ Lá niago, nene suni ánga vete holosi golesagi mina ve lamaná imó itó iza helemó nenémini gakoláa avetó iki li kimikago,

¹⁷ mikasinini ahulokoko vitive liki Izesuni negénegeka lamó. ¹⁸ Likago, Izesú eza sipigú noitigo, holosi agikagutí kimiselekago va ve nenémo Izesuki makó minatíve loko negénegeka lokago, ¹⁹ Izesú gele amemike láa loko lo amimó: Numukaloka voko Guivahanímo geikumú agika hizekago loló ogeta netá lamanalímini gakola nene vegenaka zuha aveté oko lo kemezo. ²⁰ Loko lokago, Tekapoli mikasiloka atiginá oko vike Izesú loló ota netakumú lo utó oko lo kimigo, ve vená mukilite Izesuni sigaga litiki minamó.

*Zailoni moholagi Izesuni gotó ale gili venaki
(Mat 9:18-26; Luk 8:40-56)*

²¹ Lá ikago, Izesuge sipigú itiake ima helega-loka goha iake, getató limiki niago, vegená vaí iki aitoka alegesá amó. ²² Lá ikago, monó numukú agulizaki ve makó Zailó loko noi vémo oko ²³ Izesuni ánigoake, gupá ze amike negénegeka like limó: Není mohó komámini ameni nomigo, mota hilinogo noize, zokoko agómulagi minative loko, oko gigizanitunú ale geleko nónohá zetatané loko noluve. ²⁴ Loko lo amekago, geleake, makó nivasigo, vegená alegesá amó vaí iki ámegetiki nivake, aitoka sii sii liki nivakú nene ²⁵ vogaláikú vená makó nene ikanímo avutá apelekago númase gapo kilisimasi 12 oko novigo molova molova oko noi vená minamó. ²⁶ Lusa ve mukilite miluma netá mukí amikago moni keme asú imóza, avisi netáma asú otamike alika sipisi netá gizaleko minamó. ²⁷ Eza nene Izesuni gakoláa geleake vegená alegesá amó nivakú nene Izesuni amege-saloka oake, ²⁸ agupeló ahe itó hanuva luhoaká

gotaló ale gelekinake zokatove loko agata geleake luhoaká gotaló ale gilimó. ²⁹ Ale nogilike, litá oko sepá zekago, nivisi netá asú onimikave loko agupegú gilimó. ³⁰ Gelekago, Izesú nene zámuzala agikagutí vokago geleake, vegená alegesá akutí viligoko láa loko limó: Není luhoaká gotó éaho ale gilive. ³¹ Loko lokago, aí izegipala zuhate láa liki li amemó: Vegená alegesá ikima sii sii likima nianazo, nugupeló éaho ale nogilive loko nolape. ³² Liki likago, éaho alihe loko ániganogo ánigomo mohona imóza, ³³ vená nenémo Izesú loló ota netakumú geleake ahelele novizigo, luvoluvo nozike ake, agihúna geko lo utó oko lo ame asú imó. ³⁴ Lo utó oko lo amekago, eza láa loko lo amimó: Mohónemaka, nenikumú gele alévolé anitímo gelémo zokokave. Mulukagú hulu iko vozo. Givisi netakutí zokoko minozo.

³⁵ Loko noligo, monó numukú agulizaki vemámini numukutí vegená makó iake láa liki li amemó: Mohokama mota helekave. Nenemú tisaka nanamú goha negénegeka nolotane. ³⁶ Liki gakó lámóza, Izesú nene gele ahuloake, monó numukú agulizaki vema láa loko lo amimó: Geza gehelele vizemino. Gele alévolé okogó minozo. ³⁷ Loko loake, vegená makó ámegetiki vamitave loko lo hukoko lokago, Pitaki Zemusiki agunala Zoniki kezagó kelémoko vimó. ³⁸ Viki monó numukú agulizaki vemámini numukú anitiki ánigamó nene, gakó napa napa liki ive nama iki hitagá hiziki niago ánigamó. ³⁹ Ánigoake Izesú nene numukú iteake ve venáma láa loko lo kimimó: Lekeza nanamú gakó akó napa napa liki ive nama niave. Mohóma nene helemive.

Hanuva avó akonoive. ⁴⁰ Loko alémo otitove loko gelenei gakó noligo, giza napa itamóza, vejená mukí kehelú ike kimiselekago, hetoka limikago, mohómámini izolahiko amelahiko izegipala zuha losive makolemagi kelémoko mohóma akonoitó itimó. ⁴¹ Iteake agizató nalike aí gako Kutí láa loko lo amimó: Talita kumi. Nenémini mogonáa lelí gako Kutí nene mohó koma otitane loko noluve loko neve. ⁴² Loko lokago, mohó nenémo litá oko oteake mohona oko minamó. Aí kilisimasi 12-a minamó. Itó vejená keza ángiáke litá iki sigaga goha lamó. ⁴³ Lá niago imane netakumú vejenalite gilikataze, aveté iki li kememilo loko lo hukoketake nene, ámina mohó nene nosánetá amilo loko lo kimigo nosánetá aliáke amemó.

6

Nasalete numutoka Izesuni ángi ahulamó (Mat 13:53-58; Luk 4:16-30)

¹ Izesú nene apá ahuloake, ezáa gotó apalaloka vo anitekago, izegipala zuha keza ámegetiki vamó. ² Lá ikago holisi gamena alitokago, monó numukú monó lo keme keme oko noigo, vejená mukilite giliáke sigaga sagaga litake láa liki lamó: Imane vémo nene gakó hikutí alive. Gele vevesoakaláa éaho amive. Imane ve nenémo imane alévolé suni nene hikutí ale utó oaká noive. ³ Leza aí mogonáa gelenoune. Aísi numuni geaká ve nene Maliani gipala noinae. Itó Zemusí Zosé Zutá Saimonige keí uvóipoma noinae. Mohó agunala kezagi imaneló miniki aliki iaká nianazo, áisi nene hanuva lelikitana ve noive. Liki liáke gelego, gena okago,

aliki limiki likago, ⁴ * Izesú láa loko lo kimimó: Ómasímini agepagutí gakó loaká vémini agulizá nene numutó namató puu loko vitimóza, ezáa gotó apatokagi ezáa vejenala zuhalokagi ezáa numunakagi aí agulizá minamitimó neve. ⁵ Loko loake áisi neneló Ómasímini zámuza ale utó itove loko imóza, gena avisekago ahuloake, kivisi vejená lugáa agizanitunú ale geleko nónohá zeketake kelémo zokamó. ⁶ Lá oake, aikumú gili alévolé amakumú giligo gena imó.

Izegipala zuha 12 keza monó hozaló vamó
(Mat 10:5-15; Luk 9:1-6)

Lá okago, Izesú nene numutó numutó mohona oko monó lo keme keme oko minamó. ⁷ Lá oake, minomo noitike, izegipala zuha 12 nene kelémo nupa oake, mihina iki holosi golesa vejenalitiní kigikagutí kipiliki kimisilitave loko zámuza nokimike, losi losí oko nokimisilike láa loko loke-tamó: ⁸ * Gapo vitatoka nene netá makó alemiki hánusagó aliki vilo. Itó peleti alemiki akiseaká gó alemiki gó komagú nene moni gúemiki, ⁹ likigisaló suú luhiki nene luhiaká gó lositá luhamiki vilo. ¹⁰ Loko loake láa loko lo kimimó: Itita numuni makokú itiikima ámina numukú aki-liki niviki ámina apatotí vitave. ¹¹ * Itó apá makotoka likilími lamaná amikoma itó lekelí gakó gelemikoma nene, ámina apá nahuliki vahé miliki likigisalotí mumusopa nene usagamá zi ahuliki vilo. ¹² Loko lokago, vake vejená keza kigika ali viligatave liki

* **6:4:** Zon 4:44 * **6:8:** Luk 10:4-11 * **6:11:** Apo 13:51

li utó iki li kimiake, ¹³* holosi mukí kigikagutí kip-
iliki kimisiliki itó kivisi vegená mukí nene netupa
hilikimiake kilími zokimi vamó.

Nagamí holokimiaká ve Zoní hili gakó

(Mat 14:1-12; Luk 3:19-20; 9:7-9)

¹⁴* Lá ikago gakoláa hutilí oko vike agulizaki ve
napa Heloteni agataló vo holokago gilimó. Ámina
gamenaló nene vegená makolite Izesukumú nene
Zoní monó nagamí holokimiaká vema heleneikutí
oteake imane zámuzá nene netá haitolímini ale utó
oaká noive. ¹⁵ Liki nilago lugáa keza Izesukumú
nene Ómasímini agepagutí loaká ve Ilaizá goha
okulumakutí lemeake noive liki nilago, lugáa
nenete gozapá Ómasímini agepagutí gakó liaká a ve
makokitana oko noive liki liaká amóza, ¹⁶ Heloté
nene geleake Zoní eza luvana hukotu vemámo
galegutí oteake ámina netá loló oaká noive loko
limó.

¹⁷⁻¹⁸ Nene hanuvamú lamive. Heloté nene amu-
naloka emane uvolaho Piliponi venala Helotiasini
nene ipá oko alimó. Lá okago, Zoní nene Heloteni
lo ame ame oloko vike uvokahini vená ipá oko
alenimó etamive. Loko lokago, venalámo gala
vizekago Heloté nene ve makó kimiselekago vake
Zonini agizató aliake nagá numukú ahulitamó.
¹⁹⁻²⁰ Lá ikago, Helotiasí nene Zonikumú izapaló
molokago apele hilinogo gilimóza, Zoní nene li-
himavala nomi ve minake monolagi ve minok-
ago, Heloté nene apilitomó nene Ómasímo nana
onetatihe loko ahelele vizekago Zonini gizapa
lamaná otatonazo lokago Helotiasí nene Zonini

* **6:13:** Zem 5:14 * **6:14:** Mat 16:14; Luk 9:19

apelemitimó imó. Heloté nene Zonini gakó gamena gamena geleake agata losi goha gilimóza, Zoní li gakokumú geleake laga avisimó.

²¹ Minake Heloteni nene geta gamena alitokago, mukí kugulizaki vegi lova gizapa vegi Galilaia mikasiuka vegená iti minamómagi kelémo nupa oake nosánetá vatá okimikago, niki niago, Helotiasí nene Zonini apiliti gamena ale utó imó. ²² Heloteki nosánetá niki niago, Helotiasini mololama iteake kovogisaló melekeni okago, keza ániigi kumu hiliake agulizaki ve napa nenémo mohóma láa loko lo amimó: Geza netá nemú manamú nogilitanimó nene lokako gimitove. ²³ Loko loake, Ómasímini avogisaló lo hutoko limó: Nana nana netakumú loká onetatane. Ha giminogo uve. Gizapa nou mikasimuki loká onetatanimó nene hanuva hutoko giminogo uve. ²⁴ Loko lokago, mohó nenémo hetoka lemeake izolahini nene gizapa vemámo láa loko lokanazo, nana netakumú loká otatove. Loko lokago, izolaho láa loko lo amimó: Mota helekave gilitokive loko monó nagamí holokimiaká ve Zonini luvana hutoko gotoláa nimitane loko lamane.

²⁵ Loko lokago, mohómámo litá oko agulizaki ve napa noitoka goha iteake láa loko loká otamó: Monó nagamí holokimiaká ve Zonini gotola itínasa gitegeko lapegú molokoko nimitane loko noluve. ²⁶ Loko lokago, agulizaki ve napa nenémo giligo gena imóza, Ómasímini avogisaló lo hukokumóma nenazo itó alesa molokago iki mina vegenalitini kovogisaló lo hukokunazo loko geleake, ²⁷ litá oko pilisi ve makó amisilike Zonini gotola gitegeko

alekative loko lomikago, vike nagá numukú nene Zonini luvana hutoake gotola gitegeko ²⁸ lapegú moloake aleake mohóma amekago, mohó nenémo izolaho noitoka aleko voko amimó. ²⁹ Lá okago, Zonini izegipala zuhate ámina gakoláa giliake viki gonosiváa aliki vake geha mulikú gale zemó.

*Ve 5000 nosánetá kemeko namó
(Mat 14:13-21; Luk 9:10-17; Zon 6:1-13)*

³⁰ Aposolo zuha nene losi losi iki mihina i asú iake, atiginá iki ake Izesú noitoka ali nupa ake netá iki miliki ake monó li kemekumú nene aveté iki li ami asú ikago, ³¹ vegená mukí vigá igá niago, nosánetá nata gamenagi nominazo, Izesú nene lezategó vegená niamató voko lavasú vizeko minatune. ³² Loko lokago kezáikó nagamikú lapegú itiake vake vegená niamató vamó. ³³ Nivago vegená mukí keza ániagiake ániagi vevesiake, taoni mukikutí nene mikasigú ololu liki vake goí iki-tiki neneló vi anitemó. ³⁴ * Vi anitiake vegená vaí iki alegesá iki minikago, Izesú nene sipigutí olío lemeko ániagamó nene sipsip iza gizapa venini nomimó nenéminiki minikago ániagoake, keikumú agika hizekago gakó mukí lo keme keme oko minamó.

³⁵ * Lá niago, ho lemekago, izegipala zuhate aitoka ake láa liki lamó: Imane apá nene ha gámetó nouko gamena mota asú okaze, ³⁶ viki iza gihiló numutokagi luhuva numutokagi mihina iki nosánetáini meina hizitave loko kimiselezo. ³⁷ Liki likago, konotó aleko lekezatini nosánetá kimiki nalo. Loko lokago, izegipala zuhate láa liki

* **6:34:** Nam 27:17; 1 Kug 22:17; 2 Iki 18:16; Izi 34:5 * **6:35:** Zak 10:2; Mat 9:36

lamó: Íi, moni gó lositahunú peleti meina hizekoko kemesá nenegi vo aletinogo ive. ³⁸ Liki likago, eza loká oketake limó: Lekezaloka peleti nanakí neve. Viki ániġalo. Loko lokago, viki ániġiake láa liki lamó: Ligizani helegaloka asú igo neve, itó lagaha lositá neve. ³⁹ Liki likago, mukí veġená nene hizi letiká hizi letiká iki gihisi gosoható minatave loko lokimikago, ⁴⁰ hizi letiki tivamoláa nene 100 nenéminiki itó amunaloka miniliki lemamoláa nene 50 nenéminiki minamó. ⁴¹ Lá iki minikago, peleti ligizani helegaloka asú igo itó lagaha lositáma aleake okulumatoka okenava oko ániġoake Ómasi agepoka loake peletima gitegeake, veġená gona miliki kimitave loko izegipala zuha kemeake, lagaha losimagi veġená mukilite natave loko gona moloko kimimó. ⁴² Lá okago veġená mukilite nikake kagatupa okago, ⁴³ peletigi lagahagi lumáa ali nupa iki gosúveha 12-a vaí okago ali milamó. ⁴⁴ Itó nosánetá na véa nene 5 tausen nenéminiki minamó. Vená izegipagi gatamune.

*Izesú nagamí amupiló liso liso vimó
(Mat 14:22-33; Zon 6:15-21)*

⁴⁵ Lá iki niago, eza veġenáma nokimisilike izegipala zuha nene nagamikú lapegú itiiki vola helegaloka Petesaita numutoka goí iki nivitave loko loketamó. ⁴⁶ Lá oake veġená gekévaké loko kimiseleake eza nene zopega makotó Ómasiloka linogo itimó. ⁴⁷ Lá noigo límugusi zekago, izegipala zuha nene lapegú viki viki nonohuló holukú nivago, Izesú nene ezáagó getató minake ániġamó nene, ⁴⁸ una napa aleko kogómulalokatí kehelú inogo

inazo, nagamí apiliaká nogosanitunú amuza mi-
liki apeleke ligitagani amó. Lá niago gokulu-
luva notovoigo, Izesú nene nonohuló amupiló
liso liso vike keza niatoka vo anitimó. Keza
kiviligitimó noike, ⁴⁹ nonohuló amupiló mohona
noigo ángiake, holosi noave liki giliake keza muk-
itó kelegesá legekago gopaga lamó. ⁵⁰ Lá ni-
ago, Izesú litá oko gakó lo kimike láa loko lo
kimimó: Lekelegesá legemino. Mulutini lepa
hizino. Nezama nouze. ⁵¹ Loko loake, sipigú itek-
ago hepé kii limóza, ⁵² nosánetá 5 tausen vegená
kimitotí Izesu haitopaitó avevezaha aleaká itímini
mogonáa gili hee hee lamake sigaga liki minamó.

*Genesalete mikasiloka kivisi vegená kelémo
zokamó*
(Mat 14:34-36)

⁵³ Keza vola helegaloka Genesalete numutoka
vi anitiake, nagamikú lape ali gaheva ake nagá
ziake, ⁵⁴ lapegutí olíi limikago, vegenalite litá iki
aí ángi vevesiake, ⁵⁵ ololu liki numutó numutó
vi asú iake, kivisi vegená nene ukoakogú kilími
miliake, Izesú mina numutó numutokumú giliake
neneló kilímiki vamó. ⁵⁶ Minakutí minakutí nene
taoniloka itó luhuva numutoka itó iza gihiló nu-
mutoka nene kivisi vegená nene alegesá apatoka
kilímimi miliake láa liki li amemó: Gugupeló ahe
itó hanuva gineganega gahevalokahe ali giliiki
nene zokatave. Liki negénegeka likago, áminámini
niake ali gele vegená nene zoki asú amó.

*Avóike apí a mogonatagana
(Mat 15:1-9)*

¹ Palisaio monó vejenaki Zelusale numutotí monó mogona apí-ikimiaká a ve lugáagi Izesutoka iki alegesá amó. ² Lá amó nene izegipala zuha lugáate kigizani nagamí zemake nosánetá ninago ánigamó. ³ Palisaio monó vejenaki Zuta vejená mukitoka keza golesa okatune liki avóike la gakató giliiki kigizani vauva aliki nagamí zemikima nosánetá nisá amamó. Avóike li hukiki la gakó ali amegesaló miliki lá iaká amó. ⁴ Itó maketilótí nosánetá meina hiziki alikamó nene monó gelemi ve makolímo ámina nosánetá ale geleneitimó nene ligika ale golesa iti netá loló okave liki giliake nosánetáma monó nagamí hepa hepa ikakegó niaká amó. Itó nenémini okogó minamive. Mogonatagana haitopaitolímini ali minamó. Nagamí gonigi somogi kapa lapegi nene ligikagú golotuva loko lelémo golesa okative liki nagamí ziaká amó nene avóike ali minató ali amegesaló amegesaló mililiki itemó. ⁵ Lá iaká amó nenazo, Palisaio monó vejenaki monó mogona apí ikimiaká a vegi keza Izesuni loká itake lamó: Geí izegipaka zuha nene avotegini mogonatagana ali minamake nanamú ahulikave. Nosánetá natune liki, ligika ali golotuva liaká suni aliki kigizani nagamí zemake ninave. ⁶ * Liki likago, Izesú láa loko lo kimimó: Genezatini lositaki neneta Isaiá nene alika utó iti netakumú gozapá limó nene lamaná lekelikumú lokamóma neve. Ómasímo li gakó láa loko luhuva gizonoimóma neve:

* **7:6:** Isa 29:13

Vegená mulusi imane keza kegepatunukó
nugulizá ali otiaká niamóza,
kigika nenitoka mili gímizinamake mili hotó niave.

⁷ Vegenalitini gakó nene není gakoitana okago
li kimi-kimi iki miniaká niake soza miliki gupá zi
nimiaká niave.

⁸ Lekelisi nene Ómasímo lo hukoleketa gakó ahuli-
ake vegenalitini mogonatagana ali miniaká niave.

⁹ Láa loake nene láa loko lo kimimó: Avotegini
mogonatagana alitune liki Ómasímo lo hukoleketa
gakó lekemegeza amiake niamó nene vatí
suni nego aliaká niahe. ¹⁰ * Mosé nene lekeza
izokahiko amekahiko kugulizá ale otezo, itó ve
makó eza izolahiko amelahiko usí vizekimiaká
gakó lo kimitimó nene apele hilitune loko
leketonoimóma neve. ¹¹ Láa loko limóza, lekelisi
láa liki liaká niave: Ve makó eza izolahiko
amelahiko nene hize lé oketatove loko u netá
mota kolopani loló okave. Nenémini mogonáa lelí
gakokutí nene Ómasímini mota amekuve. ¹² Loko
litikumú nene izolahini amelahini nasahilí
oketati gapo hize lí oaká noive. ¹³ Lekeza lá
iake nene Ómasímini gakó vasá ziake lekezatini
avotikini gakó alévolé iki lukeza ali miniaká
niave. Itó nenegó nomive. Nenémini netá mukí ali
miniaká niave, loko limó.

Ligika ale gopa oaká netá

(Mat 15:10-20)

¹⁴ Láa loko loake ve vená mukí sele lokago,
aitoka alegesá ikago, láa loko lo kimimó: Nénisi
nene gakó lo likimitoze, gililo. Mukitoka giliiki gili

* **7:10:** Gá 20:12; Gapo 5:16; Gá 21:17; Liv 20:9

vevesiki gililo. ¹⁵⁻¹⁶ Ni mikilí ikago lakagatupagú lemeaká noi netá nenémo likigika ale golotuva lamitimó neve. Likigikagutí iteaká noi netalímo likigika ale gopa itimó neve.

¹⁷ Loko loake numukú iteake, ve vená ámegekimikago, izegipala zuhate ámina anoza gakokumú loká imikago, láa loko lo kimimó: ¹⁸⁻¹⁹ Íi, lekelisi ámináminiki lakagata kolosamimó niahe. Mogonáa gili vevesamahe. Legepatunú netá matá nokuko ligikagú lemekoko eza gapovagú voaká noinazo, lakagatupagú lemeaká noi netalímo likigika ale gopa osá amive. Loko limó nene nosánetá mukí nene noaká netakó minokave loko live. ²⁰ Láa loake makó láa loko limó: Likigikagutí iteaká noi netalímo lekemeni ale golotuva loaká noive. ²¹ Vetini kigikagutí nene golesa kagata geleaká, mokoló mogona, gumina, vegená kepele heleaká, ve vená huki ezega emega oaká, ²² ániigi lamaná oaká, netá golesa aleaká, kogoka vizeaká, hokolizá itó mumuzó oaká, kemegeka loaká, kugupe aleko iteaká, zogozogo vizeaká nenemú noluve. ²³ Imane netá golesa mukí nagatumó nenémo likigikagutí iteake lekemeni ale golotuva loaká noive, loko limó.

Silia mikasiukatí hetoka venalímo gele alévolé imó

(Mat 15:21-28)

²⁴ Nenetí ámina apá ahuloake Tulo numutoka apá agilikaloka vimó. Vo aniteake, numuni makokú iteake nenemú gelemítave loko gilimóza halá gemitimó okave. ²⁵ Vená makolímini mohola nene holosi makolímo agikagú lemeake alémo golesa o minamó. Lá noigo ámina venámámo

Izesuni gakoláa geleake litá oko ake Izesuni agisagú agihúna gimó. ²⁶ Ámina vená nene Zuta vená negopa hetoka vená minake, Pinisia apá nene Silia mikasiuka getamó minatímo eza nene moholámini agikagutí holosi apeleko amisilitive loko loká omikago, ²⁷ Izesú nene Isilae vegenalite Ómasímini lusa goí iki ali alitakumú geleneike anoza gakó makó láa loko lo amimó: Izegipatini nosánetá ipá oko galatini kimitunimó nene etamive. Izegipa nenete goí iki niki kagatupa itave. ²⁸ Loko lokago, ámina hetoka venámámo gele veveso minake ezáagi Ómasímini lusa ale alitikumú geleake láa loko limó: Guivahanínemaka, lamaná lokanimóza, nezama litoze. Nosánetá noaká holomalotí izegipate niki lana koma alemó zimó nene galatini netá loló oaká noive. ²⁹ Loko lokago, Izesú lo amike limó: Láa loko lanikumú gele gumuze, atiginá oko numukaloka vozo. Holosi nenémo mohokámini agikagutí mota ahulomiake vokave. ³⁰ Loko lokago, numunaloka vike ánígamó nene, holosi nene moholámini agikagutí golisi okago holomaló hanuva akonoigo ánígamó.

Izesú negi ve alémo agata koló imó

³¹ Lá okago, Izesú nene Tulo numutotí atiginá oko vike Sitona numutoka avilegeake, vike Tekapoli mikasi avilegeake Galilaia nonohulotó vo anitimó. ³² Vo anitekago, negi ve makó genezala gena imó nene alímiki Izesutoka vi anitiake, eza nene agizanitunú nónohá zemikiko lamaná itive liki negénegeka likago, ³³ vegená alegesá akutí alémo otopá zeake kezáikó minasike agizani hisulatunú agatagú hizeake gituhú oake,

agizanitunú genezalaló lupizeake, ³⁴ okulumakú okenava oko ángoake, ahuu lo nahulake láa loko lo amimó: Epata. Nenémini mogonáa lelí gakokutí nene koló ino loko. ³⁵ Loko lokago, agata koló okago, genezala viligoake gakó lamaná limó. ³⁶ Lá okago, Izesú nene avetó iki vegená li kememita-ve loko lo hukoketamóza, eza lo hutoko loketaha loketaha negénegeka liki li utó iliki vamó. ³⁷ Keza nene sigaga goha liki minake láa liki lamó: Netá mukí loló noimó nene lamaná okogó loló oaká noive. Kagata mola vegená nene ale vevesokimikago gakó giliaká niave, itó kegepa lakolí i ve ale vevesokimikago gakó liaká niave, liki lamó.

8

Izesú Ve 4000 nosánetá kemeko namó (Mat 15:32-39)

¹ Gamena nene zupa vegená vaí iki alegesá ikago, keí nosánetá nomigo, Izesú nene izegipala zuhama sele lokago, aitoka ikago, láa loko lo kimimó: ² Vegená mukí imane nosánetá namake nenitoka nene gamena losive makole minikago milumáini gelekuve. ³ Itó lugáa nene hotokatí nianazo, itína gaúna giliki niko numúitoka kimiselekugo vitamó nene gapoloka kovonana vizinogo ive. ⁴ Loko lokago, izegipala zuhamate láa liki li amemó: Mikasi gomopalaló imane vegená mukí imane nosánetá hikutí ale utó oko kemeko natune. ⁵ Liki likago, Izesú loká oketake lekelitoka peleti nanakí neve loko lokago, keza 7-a neve. ⁶ Liki likago, vegená mukí nene mikasiló minatave loko lokimiake, peleti 7-a aleake Ómasi agepoka loake,

gitegeake vegená gona miliki kimitave loko izegipala zuha kemekago, keza vegená gona miliki kememó. ⁷ Lagaha lagasó minokago, nenemuki Ómasi agepoka loake imanegi gona miliki kimilo loko lokimikago kememó. ⁸ Vegená nenete niki niki kagatupa okago, lumáagi lanahanagi ali nupa iki gosúveha 7-a vaí okago ali milamó. ⁹ Ámina nosáneta na vegená nene 4 tausen nenéminiki minake namó. ¹⁰ Lá ikago kimiselekago numúitoka nivago, izegipala zuhagi litá iki sipigú itiake Talamanuta numutoka vamó.

Alévolé suni ánigatune liki lamó
(Mat 16:1-4)

¹¹ * Vi anitikago, Palisaio monó vegená keza iake gimivagú miliki okulumakutí ve noitihe loko gilitune liki alévolé suni ale utó okako ánigatune liki Izesugegi lova leta amó. Lá ikago, ¹² * Izesú gele golesa oake láa loko limó: Imane oko moloko oaká nou suni ángiaká nia ve neneta alévolé suni ale utó okugo itína ánigatune liki nanamú liaká niave. Lamaná lo likimitoze, gililo. Alévolé suni makó ale utó ugo ángaminigave. ¹³ Loko loake, ahulokimiake izegipala zuhagi nene sipigú goha itiake ima helegaloka amó.

Palisaio monó vegenaki Heloteki keí mogonata-gana
(Mat 16:5-12)

¹⁴ Lá niago, peletimú kagatí molokago, alemago peleti hamokó nene nagamikú lapemagú minamó. ¹⁵ * Lá okago, Izesú nene Palisaio monó

* **8:11:** Mat 12:38; Luk 11:16

* **8:12:** Mat 12:39; Luk 11:29

* **8:15:** Luk 12:1

vegi Helotémagi soza mogonáinimú anoza gakokú kagata aleko láa loko limó: Palisaio monó vegi agulizaki ve napa Heloteki keí lulu vizeaká netá ehe, lekepelekatize. ¹⁶ Loko lokago, izegipala zuhamate peletímini lulu vizeaká netakumú lihe liki kezáitoka láa liki ligili hagili iki minamó: Peleti nene lagatí molokago ahulokoko unikumú lokave. ¹⁷ Liki la gakolímo agataló holokago geleake láa loko lo kimimó: Peleti ahulokunike unikumú lokave liki nanamú ligili hagili iki niminave. Azozá netá matá oko moloko utímini mogonáa giliki velesá gili hee hee lamahe. Likigika kolosamihe. ¹⁸ * Lekeza lokogómula nemóza ánigamahe. Lakagata nemóza gelemahe. Lakagatí molokago ahe. ¹⁹ Ve 5 tausen keikumú peleti ligizani lugaloka asú igo gitegekugo niake kagatupa okago lumáa ahulikago gosúveha nanakí vaí iki aleve. Loko lokago, keza 12-a neve, liki lamó. ²⁰ Láa liki likago, eza vejená 4 tausen keikumú peleti 7-a kemekugo niake kagatupa okago lumáa gizaká iki ali milamó nene gosúveha napa nanakí vaí iki aleve. Loko lokago, keza 7-ave liki lamó. ²¹ Láa liki likago, eza láa loko lo kimimó: Nene ániginamóma nemóza, goí oko loló oleketu netakitana oko goha loló itomó neve liki velesá gili vevesinamahe, loko limó.

*Petesaita numutoka agómula lika ve ale golouto-
tamó*

²² Lá okago, vake Petesaita numutoka vi anitikago, agómula lika ve makó nene Izesutoka alímiki viake, agizanitunú ale gelekoko ale

* **8:18:** Zel 5:21; Izi 12:2; Mak 4:12

goloutative liki negénegeka likago, ²³ agómula lika vemámini agizató aleake símekaloka alémoko limike, agómulaló gituhú otake agizanitunú ale geleko nónohá zetake loká otake netáma nánigape. ²⁴ Loko lokago, agómula goloutoko ángoake vejená mihina niago nánigumóza, zagitana iki niago nániguve. ²⁵ Loko lokago, goha agizanitunú agómulaló nónohá zemikago, ángo hokolotoake lamaná okago, netá mukí ángo kolosoko ánguve loko limó. ²⁶ Lá okago, Izesú nene numunaloka namisilike limó: Numuni napaloka goí oko vamoko geza minoko aleko itanitoka vozo, loko lo animó.

Pitá Izesuni mogonamú lo utó imó
(*Mat 16:13-20; Luk 9:18-21*)

²⁷ Izesú nene izegipala zuha kelémoko Sisalia mikasiuka agulizaki ve Piliponi agulizató apatoka luhuvagi numuni numutó numutó vamó. Gapoloka nivake izegipala zuha loká oketake ve-genalite nenikumú éahove liki liaká niave. ²⁸ * Loko lokago, keza li amiki lamó: Monó nagamí holokimiaká ve Zoní nene goha utó oko noane liki liaká niave. Itó lugáa nenete Ilaizá eza gozapá okulumakú iti vema goha lemeko noane liki liaká niave. Itó lugáa nenete Ómasímini agepagutí gakó liaká a ve gozapá minamokitana noane liki liaká niave. ²⁹ * Liki likago, Izesú goha loká oketake lekelisi nenikumú éahove liaká niave. Loko lokago, Pitá nene láa loko limó: Geza Ómasímo gologí oletatane loko lo mololeta vema noane. ³⁰ Loko

* **8:28:** Mak 6:14-15; Luk 9:7-8 * **8:29:** Zon 6:68-69

lokago, aikumú avetó iki vegená láa liki li kememita-
tave loko lo hutoketamó.

Izesú alika hiliti gamenamú lo kimimó
(*Mat 16:21-28; Luk 9:22-27*)

³¹ Lá okago, gamena nene zupa apí oko gakó láa loko lo utó oko lo kimimó: Okulumakutí lumu ve gihila neza nene miluma netá mukí nimiiki, monó gizapa vegi guguni giziaká ve napagi monó mogona apí-ikimiaká vegi keza není ániigi ahulikiko miluma netá mukí nimiiki, nipili hilikiko, gamena losive makole minokinake heleneitokutí goha otinogo uve. ³² Loko lo utó oko lo kemekago, Pitá nene alémo apazá zeake géneka like gahá amimóza, ³³ Izesú viligoko izegipala zuha ániigoake Pitani gahá namike limó: Satani gakó lanitika mino olové omane. Geza gakó gelenanimó nene Ómasímini gakó lamanike vegenalite kigikagutí liaká nia gakó nene lokane.

³⁴ * Loko loake, vegená mukí itó izegipala zuhamagi sele lo kemeake láa loko lo kimimó: Ve makolite není némegetatune liki nigilikima kugupémo giliti netá gili ahuliiki zohota zaló kipili hilinigi miluma netá gihikitatakumú gili zagiiki némegetatakumule. ³⁵ Makó keza nene kigika kemeníini aliki amánapa iki minata vegená nene kigika kemeni gopa inogo ive. Itó makó keza nenikumule liki itó gakó lamanakumule liki kigika kemeni vínasi ahulatamó nene alévolé kemetameni alinigave. ³⁶ Ve makó keza imane mikasímini amupiló ne netá ale asú iiki itó kezáini kigika kemeni gopa okoko tolova itimó

* **8:34:** Mat 10:38; Luk 14:27

nene nenémo nana oko kelémo lamaná itive. ³⁷ Kigika kemeni nene nana netatunú meina hizi-iki goha alitamó neve. Ma nomive. ³⁸ Imane vejená mukí kéisi netá golesa aliaká nia vejená itó Ómasi keme gesa amiaká nia vejená niago, holúikú ve makó keza nenikumupe monónemupe gilikiko kovoza hilitimó nene, okulumakutí lumu ve gihila neza aménehini lapaná nenémo numupiló itekiko apazá agelova kelémoko limito gamenaló nene keza kovoza hilimó nenéminoko nezagi kugulizá ale otitokumú novoza hilinogo ive, loko limó.

9

¹ Láa loko loake, Izesú miní ameko láa loko lo kimimó: Lamaná lo likimitoze, gililo. Lekelisi ató nene nia ve lekelikutí lugáa makó hili asú inamiki ha niko Ómasímini gizapa olikimiakalímini zámuza nene amuza moloko utó okiko ániganigave.

*Izesuni agupe haitolímini imó
(Mat 17:1-13; Luk 9:28-36)*

² Loko loake, hoza gamena 6-a minomo noitike Izesú nene Pitá Zemusí Zoní kezagó kelémoko agoka hánagú kezáikó itemó. Neneló kogómulaló noike haitó agupe ale luhoake noigo, ³ gineganevámo gizopa vaevae loko minokago, mikasigú vejenalite nenéminoko ale mokoná lamoaká nenéminoko minamó. ⁴ Lá okago Ómasímini agepagutí gakó imane amunaló liakó asi ve Ilaizako Moseko utó i kimikasigo, keza Izesugegi gakó ligili hagili iki minamó. ⁵ Lá niago, Pitá nene Izesuni láa loko lo amimó: Monó gizapa velemaka, imaneló minuhá laga okaze. Nenemú

gaizopa losive makole geleketatunize, makó geile, makó Mosenive, makó Ilaizanive. ⁶ Loko limó nene kelegesá goha legekago, lo amiti gakokumú vitagá oake nene gakó gopa limó. ⁷ * Noligo, límusi sahehevámo lemeko ze hitokimikago, límusigutí Ómasímo láa loko limó: Imane nene nigika ameká nou gipáne noize, aí gakó gili alilo. ⁸ Loko lokago, litá iki gilipe iki ánígamó nene keitoka Izesú ezáágó noigo ánígamó.

⁹ Ánigiake Izesugegi agokagutí nilemeke Izesú ánígina netakumú avetó iki li kememitave loko, okulumakutí lumu ve gihila neza helenoitotóti otekugogó li kimitave loko loketamó. ¹⁰ Láa loko li gakó gili alemóza, hilinakutí otiakalímini mogonamú loká loká amó. ¹¹ * Láa liki loká itamó: Monó mogona apí-ikimiaká ve nenete gologí oletati vema velesá anitemiko Ilaizá goí oko anitive liki nanamú liaká niave. ¹² Liki loká imikago, eza monó nagamí holokimiaká ve Zonikumú láa loko lo kimimó: Ilaizá goí oko aniteko netá matá mukí ale vavá itive liki lamaná linave. Itó okulumakutí lumu ve gihila neza nene miluma netá numupiló miliiki gopoguni milinitatave liki nenikumú monó gotolaú luhuva gizinamómagi neve. Áminamú lakagatí molahe. ¹³ Itó Ilaizakumú láa loko lo nolukumuve. Eza mota anitekago, aikumú monó pukugú luhuva gizona gakotó kezáini kagata gele netá golesa mota lilí imikago mota helekave, loko limó.

*Izesú holosi golesagi mina gipa alémo zokamó
(Mat 17:14-21; Luk 9:37-43)*

* **9:7:** Mat 3:17; 2 Pit 1:17-18 * **9:11:** Mal 4:5; Mat 11:14

¹⁴ Láa loko lokago, izegipala zuha lugáa nia-toka vi anitiake áni gamó nene, ve gená vaí iki alegesá iake kezagi monó mogona apí-ikimiaká vegi lova leta iki niago áni gamó. ¹⁵ Ánigikago, ve gená mukí nenete Izesuni áni giake, litá iki sigaga goha litake aitoka ololu liki vake geké litamó. ¹⁶ Lá niago Izesú loká oketake lekeza nanamú lovaleta niave. ¹⁷ Loko loká okimikago, keikutí ve makolímo oteake láa loko lo amimó: Monó gizapa velemaka, holosi golesa gipánémini agik-agú lemeko minoake agepa aleko lakolí okago, alémoko geitoka nouve. ¹⁸ Gipáne nenémo holosi nene agikagú lemeake alémo gopa napa oaká gamena nene mikasigú alémo akokago zupakopá zeko mohona oaká noive. Lá noike sehovala novilike agepagutí gelilikelilí nolike, agisa agizani pehe loake minoaká noive. Lá okago, izegipaka zuha keza holosi apiliki amisilitave loko lo kumumóza amiselemitamó okave. ¹⁹ Loko lokago, Izesú láa loko lo kimimó: Lekeza ató imane gili alévolé amamó neneta, lekelikumú goselé nepelekave. Gamena gamena lekezagi minoloko voko mininake likizamuha hizekogó minatohe. Izegipama nénisi noutó alímiki alo. ²⁰ Loko lokago, gipa nene aitoka alímiki ikago, holosi golesa nenémo Izesuni áni goake gopa alémo ininá okago, mikasiló pou loko akoake, ako viligá viligá noike, sehovala vilimó. ²¹ Lá noigo Izesú nene amelahini loká otake hí gamenaló gizalimó neve. Loko loká okago limó: Izegipa komaló gizaleneimó neve. ²² Mukí gamena ámina netalímo alémo golesa inogo lokú nemó nagamikú nemó ahelú o ahuloaká onoimóma neve. Lá onoimóza, zámuza geitoka

neikoma lelikumú gigika hizekiko lelémo vatí ozo. ²³ Loko lokago, Izesú láa loko lo amimó: Zámuza geitoka neikoma loko lanimó nene nanamú lane. Makó keza Ómasímo lelémo vatí itimó neve liki gili alévolé iki minatamó nenete mukí netá nene vávani ikigó lilí itamóma neve. ²⁴ Loko lokago gipámini amelaho nene litá oko gamoga geko limó: Koma gele alévolé onoumóza koma miní ameko luhusáne ale kii lonimikako napa oko gele alévolé itove loko noluve. ²⁵ Loko lokago, Izesú ánigamó nene ve vená mukí alegesá niago, ánigoake, holosi golesama lovaga lo amike namisilike limó: Holosi golesa geza agepa agata aleko lakolí anitika, agikagutí itekoko vozo. Lá okoko goha atiginá oko oko itemitane loko lo nohukogetuve. ²⁶ Loko lokago, gopaga like alémo ininá goha okago, agikagutí iteko vimó. Iteko vokago, gipa nenémo gonosigitana oko mikasiló ako minakumú nene vejená makolite mota helekave liki lamó. ²⁷ Láa liki lamóza, Izesú nene agizató aleko alémo otekago ote minamó.

²⁸ Lá okago, Izesú nene izegipala zuhamagi numukú itiki kezáikó minake láa liki loká itamó: Leza nene nanamú apeleko amiselemuháma neve. ²⁹ Liki likago, eza láa loko lo kimimó: Holosi imanémini nene netá makotunú kepeleko kimiseleakaláa nomive. Ómasiloka loakatunukó kepeleko kimisilinogo une, loko limó.

Izesú alika hiliti gamenamú goha epoapoga lo kimimó

(Mat 17:22-23; Luk 9:43-45)

³⁰ Ámina apá ahuliake Galilaia mikasi aviligiki vamó. ³¹ Nivake Izesú nene izegipala zuhama

láa loko lo keme keme imó: Okulumakutí lumu ve gihila neza nilími gala vetini kigizakú milikiko nipili hilinigave. Nipili hilikiko gamena losive makole minokinake goha otinogo uve. Loko lo kemeake vegená makolite ámina gakoláa gilikatave loko legesó oko vimóza, ³² ámina gakó nene gili vevesamake loká otatune liki lamóza, kehelele vizekago loká itamamó.

*Vegená mukikutí éaho livilegeko noive
(Mat 18:1-5; Luk 9:46-48)*

³³ Kapanao numutoka vi anitiake, numunagú itiake Izesú loká oketake gapoloka nanetakumú ligili hagili ave. ³⁴ * Loko loká oketamó nene gapoloka nivake lelikutí éaho livilegeko agulizaki ve noive liki kezáitoka ligili hagili anazo, anotó alemiki kegepa apiziki minamó. ³⁵ * Lá niago, mitó minake izegipala zuha 12-a sele lo kemeake láa loko lo kimimó: Ve makó eza nugulizaki ve napa minatove loko gilitimó nenémo lemeko minoko vegená mukilitini gelekelé oketanogo ive. ³⁶ Loko Izesú loake, izegipa koma makó nene holúikú alémoko oko hize otemiake aputá vizeneike láa loko lo kimimó: ³⁷ * Makó keza izegipa koma imanéminiki nenikumule liki nasahilí itatamó nene, není nasahilí inimiaká niamó geleaká noive. Itó makó keza nasahilí inítamó nene nenikó nasahilí inítamítave. Améneho nimisili ve aiki nasahilí itatamó geleaká noive, loko limó.

* **9:34:** Luk 22:24 * **9:35:** Mat 20:26-27, 23:11; Mak 10:43-44;
Luk 22:26 * **9:37:** Mat 10:40; Luk 10:16; Zon 13:20

*Keikutí ve noamitimó nene lelikutí ve noitive
(Luk 9:49-50)*

³⁸ Lá okago, Zoní láa loko lo amike limó: Tisalemaka, ve makolimo geí gugulizató like holosi golesa nene vegeñalitini kigikagutí kepeleko nokimisilligo ánigunimó nene, lelí lémegetamimó nenazo, géneka lotunimó neve. ³⁹ Loko lokago Izesú láa loko limó: Lekeza géneka litamilo. Makó eza nugulizató loko alévolé netá netá loló itimó nene litá oko nenikumú alevo letovo aminogo ive. ⁴⁰ * Vegená makó keza lelí gala ve minamitamó nene lelikutí vegená ninigave. ⁴¹ * Neza lamaná lo likimitoze, gililo. Makó keza není vegenáne zuha niakumule liki geha nagamí kapu hamokó ihiki likimitamó nene haha aminogo ive. Meinaváa alitamó neve.

*Golesa netakumú gala vizeaká gakó
(Mat 18:6-9; Luk 17:1-2)*

⁴² Nenikumú gili alévolé i mina izegipáne zuha limiki minamoki keikutí ve makolimo netá golesa alitive loko agoka vizeko litimó nene, agae, Ómasímo nana otatimó neve. Ámina vémini luvanaló gehani napa nagá ziki age nagamikú ahelú i ahulatatímini avilegeko genavagi netá golesa loló otanogo ive. ⁴³⁻⁴⁴ * Lá onoinazo, gigizani nenémo lihima aleaká gapogú gelémo nomilikoma gigizani hutozo. Geza nene gigizani avasavagi minokoko ló apakuka lihamiti lokú holokataninazo, gepili minoko okulumakú ititanimó nene lamaná itive. ⁴⁵⁻⁴⁶ Gigisa nenémo

* **9:40:** Mat 12:30; Luk 11:23 * **9:41:** Mat 10:42 * **9:43-44:**
Mat 5:30

lihima aleaká gapogú gelémo nomilikoma nene gigisa hutozo. Geza nene gigisa avasavagi nooko ló apakú gehelú ikatanazo, gepili minoko okulumakú ititanimó nene lamaná itive. ⁴⁷ * Gogómula nenémo lihima aleaká gapogú gelémo nomilikoma nene gigizanitunú gogómula hize likozo. Geza nene gogómula avasavagi nooko lokú gehelú ikatanazo, gogómula hamokó minoko Ómasímini avogisaló ititanimó nene lamaná itive. ⁴⁸ * Ló apakú holoko minatanimó nene, gugupegú ginini hizitimó nene asú amiti lokú voko minanogo ane. ⁴⁹ Nosánetakú nene anuva amoko laga itive loko age ahuloaká nune. Nenémini oko vegená mukitoka kigikámini lotuva nene Ómasímini ló nenémo latimó neve. ⁵⁰ * Age nene netá lamaná nemóza, agema melelé amitimó nene nana iki goha alími melelé itave. Ma lá aminigave. Lekelisi nene age nenémini iki minalo, itó hulu iki nene minalo, loko limó.

10

Izesú vená kimisele ahuloakakumú gakó lo kimimó

(Mat 19:1-12; Luk 16:18)

¹ Izesú ámina apá ahuloake, limike Zutaia mikasi avilegeake Zota nagamí vola helegaloka vokago, vegená mukí goha aí amatoka alegesá ikago, goí oko aleaká imó nenéminoko monó lo keme keme oko minamó.

² Lá noigo, Palisaio monó vegenalite anitiake loká itake gimivagú milake lamó: Mosé lo hukoko

* **9:47:** Mat 5:29 * **9:48:** Isa 66:24 * **9:50:** Mat 5:13; Luk 14:34-35

li gakoú nene ve makolímó venala amisele ahulato ve loko hanuva amisele ahulatimó neve liki gizinamóma nene etatihe etamitive. ³ Láa liki loká imikago eza ale viligoko loká oketake limó: Mosé nene nanave loko loleketamó neve. ⁴ *
 Loko lokago, keza lamó: Vená kimisilinigima nene luhuva netá giziki kimiiki kimisilitave loko Mosé gele kemeaká imóma nena. ⁵ Liki likago, Izesú láa loko lo kimimó: Lekelisi negi nagi hiziki likigika gopa ovimó nenemú imane lo hutoleketa luhuva gizamóza, ⁶ * netá matá apí oko kelémo utó i game-naló emane nene Ómasímó vegi venaki kelémo utó imó. ⁷ Nenemú Ómasímó láa loko limó:
 Nenemú ve makolímóhe makolímóhe izolahiko amelahiko ahulokimioko venalagi nene,
⁸ * kugupe nemó kigika nemó hamokó loló okiko apiziki minatáive.

Loko gakó imane limó nenazo, keza lositá hóu liki minaminigasive. Hamokó kugupe loló onoimó gelekave. ⁹ Nenemú Ómasímó kelémo apizimó nenazo, vegenalita kelémo hotopotó oakaláa nomive.

¹⁰ Loko lokago, numukú itiki niake, izegipala zuhamate ámina gakoúmú goha loká imikago, ¹¹ *
 Izesú láa loko lo kimimó: Ve makó eza venala amisele ahulokoko haitó vená alitimó nene, ve vená huko ezega emega imómámini lihima alinogo ive. ¹² Itó ámináminoko vená makolímó vana amisele ahulokoko ve makotó vitimó nene, ve vená huko ezega emega imómámini lihima alinogo ive, loko limó.

* **10:4:** Gapo 24:1-4; Mat 5:31 * **10:6:** Apí 1:27, 5:2 * **10:8:**
 Apí 2:24 * **10:11:** Mat 5:32; 1 Koli 7:10-11

*Izesú izegipa koma kama nónohá zeketamó
(Mat 19:13-15; Luk 18:15-17)*

¹³ Ve vená mukí keza agizanitunú kugupeló aleko nónohá zeketative liki izegipa koma kama Izesutoka kilímiki vikago, izegipala zuhate gahá kememó. ¹⁴ Gahá kimikago, Izesú ángoake mulunagú golesa okago láa loko lo kimimó: Lekeza izegipa koma nene ahulikimikalo. Nenitoka ataze. Keza izegipa koma nenémináa nene Ómasímini avogisaló viakalímini mututoni nianazo, li hoipa ikitamilo. ¹⁵ * Neza gakó lamaná lo likimitoze. Ve makó keza izegipa namuni monokú itiaká niamómáminiki vávani iki monokú itemitamó nene, Ómasímini avogisaló nene keké vaminigave. ¹⁶ Loko lo kemeake, izegipa komama kuputá vizike agizanitunú nónohá zeketamó.

*Henonavagi ve
(Mat 19:16-30; Luk 18:18-30)*

¹⁷ Izesú eza ámina apatotí vitove loko noigo, ve makolímo ololu loko vike alapusa hizike loká otake tisá lamanámaka, nana okinake alévolé nemetameni alitomó neve. ¹⁸ Loko lokago, Izesú láa loko lo amimó: Geza nenikumú ve lamanale loko lanimó nene mogonánemú gele hee lo minoko nolape itó hanuva nolane. Lamaná améneho Ómasi hamokó noize, makó nomive. ¹⁹ * Itó geza gapo lota gakó geleaká noane. Láa lokove: Geza vegená kepele helemo. Ve aleve suni ale gopa oko huko ezega emega amo. Gumina alemo. Soza hakupá gakó lamo. Vegenalitini netá hanuvamú

* **10:15:** Mat 18:3 * **10:19:** Gá 20:12-17; Gapo 5:16-20

alemo. Izokahiko amekahiko nene kugulizá ale otezo. ²⁰ Loko lokago, eza láa loko lo amimó: Tisatemaka, neza nene umaki velotí nene ámina hoza aleaká noumole. ²¹ Loko lokago, Izesú nene gonú napilike agika aitoka moloake gakó láa loko lo amimó: Netá hamokó nemó nene ale hee litanize. Geza voko henokanoka mukí molokoko meinaváa monima aleoko gohogó vejená gona moloko kemeoko oko némegetozo. Lá okako okulumakú helisa henoni geitoka utó ogetanogo ive. ²² Loko lokago, ámina gakó geleake aí henoni vaí o minamó nenazo, gona moloko kimitohe loko agata gilitímo agoka agepa muhelé okago, mulunagú gena avisekago vimó.

²³ Lá oko novigo, Izesú viligoko izegipala zuhama ánigoake láa loko lo kimimó: Henoníini vejená nene Ómasímini lapanató silipa iki itesá neve. ²⁴ Loko lokago, izegipala zuhamate ámina gajokumú ininá amóza, Izesú goha láa loko lo kimimó: Izegipánemata, Ómasímini amakú vo holoaká nene genavagi neve. ²⁵ Kamele izámo nakasi vovónagú voakaláa nene vávani oko nomimóza, henonavagi ve nene Ómasímini lapanató voakaláa nene áminámini oko genavagi golesa neve. ²⁶ Loko lokago, ininá goha iake lí amiki lamó: Láa lokoma éaho agutó vizekiko minoloko voko minative. ²⁷ Liki likago, Izesú gonú nokipilike láa loko lo kimimó: Vegenalite nenémini itamoláa nomimóza, Ómasímo netá makó loló itove loko agata giliti netá nene vávani okogó loló oaká noive.

²⁸ Láa loko lokago, Pitá láa loko lo amimó:

Gelenape. Leza mukí netá matate ahulokunike geí gémegetokuninazo, alika nene meinava alitunimó nehe. ²⁹ Loko lokago, Izesú limó: Neza lamaná lo likimitoze. Ve makó keza numúinihe gouna zuhahe izóikini améikini izegipáinihe míinihe nenikumule liki itó není gakó lamanakumule liki ahulatamó nene, ³⁰ itína imane gamenaló nene numuni gouna zuha izóikini izegipáini míini 100 nenéminiki alitamóza, vejená makolite hanuvamú gopoguni milikitanigave. Lá ikiko alika utó iti gamena keza alévolé oko minoaká kemetamenigi minanigave. ³¹ * Lá onoimóza, itína goí ina vejenakutí mukilite alika milanigave, itó alika milina vejenakutí mukilite goí inigave, loko limó.

Izesú ezáa alika hilitikumú gakó ligo losive makole imó

(Mat 20:17-19; Luk 18:31-34)

³² Gapoló vake Zelusalega itinigi niake Izesú ale goí oko novigo, izegipala zuhamate ininá niago, ámegetiki va vejená alika kezáitoka utó iti netakumú kehelele vizigo minamó. Lá niago, Izesú eza izegipala zuha 12 nene kelémo otopá zeake, aitoka alika utó iti netakumú láa loko lo kimimó: ³³ Gililo. Leza Zelusale numutoka notune. Neneló okulumakutí lumu ve gihila není nene gugini giziaká ve napagi monó mogona apí-ikimiaká vegi keí kigizakú milikiko goní inítiki nipili hilita gakó li hukiki hetoka vetini kigizakú milanigave. ³⁴ Lá ikiko, gopoguka linitiki gituhú inítiki segi nogosanitunú nipiliiki nipili hilinigave. Lá ikiko,

* **10:31:** Mat 20:16; Luk 13:30

gamena losive makole minokinake goha otinogo uve, loko limó.

Zemusiko Zoniko loká asi netá
(Mat 20:20-28)

³⁵ Zepetaioni gipala lositá Zemusiko Zoniko nene Izesutoka asike láa liki lasimó: Tisalemaka, lélisi nene nemú manamú logimikusigo nene, ámina netá aleletatane loko nolusive. ³⁶ Liki likasigo, eza nana netá aleleketatokumú nilasive. ³⁷ Loko lokago, láa liki li amesimó: Geí lapanakaló leza geí gigilika luga luga minalizo loko gele limitane loko nolusive. ³⁸ * Liki likasigo, Izesú láa loko lo kimimó: Loká ninitasi netalímini mogona gili gopa ikasike likasive. Nénisi nene ekesá netá natomó nene lekelisi áminagutí hanuva natáimó nehe. Itó miluma netá gihitomó nene lekelisiva gihitáimó nehe. ³⁹ Loko lokago, láa liki li amesimó: Hanuva natáimó nena. Liki likasigo, Izesú láa loko lo kimimó: Ekesá netá natomó nene lamaná lekezagi nanigasive. Itó miluma netá gihitomó nene lekezagi gihitáimóza, ⁴⁰ není nigilika luga luga minoakaláa nene, není netá nego likimitohe. Ale vavá oketa vegenalitini holomamú nilasive.

⁴¹ Loko lokago, izegipala zuha lugáa 10-a ámina gakó giliake, Zemusiko Zoniko keikumú mukahá kipilikago, ⁴² * Izesú nene izegipala zuha mukí sele lo kemeake láa loko lo kimimó: Ve makokumú nene mikasiuka vegenalitini kugulizaki ve niave liki liaká niamó nenete gelekelé izegipáini nene alévolekutí gizapa ikimiaká niave. Itó guivahani keza nene ámina iki ámemenáa kiviligiki

* **10:38:** Luk 12:50 * **10:42:** Luk 22:25-26; Mat 23:11; Mak 9:35

miniaká niamó nene lekeza giliaká niave. ⁴³ Lá onoi móza, lekelitoka lá oko minamino. Leke-likutí ve makolímo nugulizaki ve minatove loko nolokoma nene hanuva lemetigí oko gelekelé oleketoko minatize. ⁴⁴ Makó eza mukí vegená kivilegeko minatove loko nolokoma lemeko vegená mukilitini megusa izegipa loló oko gelekelé oketatize. ⁴⁵ Okulumakutí lumu ve gihila neza gelekelé initatave loko lememuve. Vegená mukitoka gelekelé oketoko golesa netáini nene meina hizeko gologí oketatove oko nene minoko aleko u nugupe ahulatove loko lumumole, loko limó.

Agómula lika ve Patimiasí goha pulusoko áni gamó

(Mat 20:29-34; Luk 18:35-43)

⁴⁶ Izesugegi Zeliko apatoka viki anitemó. Ámina apá ahulanigi niake, ezagi izegipala zuhagi vaí iki alegesá iki mina vegená makó nivago, Timeoni gipala Patimiasí eza agómula lika ve monimú voká vokató ve nene gapo agataloka minamó. ⁴⁷ Minake, Nasalete ve Izesúma noave liki likago geleake, gamoga geko sele loko limó: Izesuvo geza nene agulizaki Tevitini agávolaga, gologí oletatane loko lo mololeta velemaka, nenikumú miluma gelenetamane. ⁴⁸ Loko lokago, vegená mukilite legesó oko minative liki agómula lika vema gahá ameke li amemóza, áisi gele ahuloake gamoga geko sele limó: Geza Tevitini agávolagamaka, nenikumú gigika hizino. ⁴⁹ Loko negénegeka ligo ligo, Izesú geleake voko gapoló noi ke ámina ve nene sele likiko ino. Loko lokago, agómula lika vema láa liki sele li amemó: Gogoliza

vizeko otekoko ano. Geí sele nolize. ⁵⁰ Liki likago, hepé gola gololohá o ahuloake, moí oko oteake Izesutoka vimó. ⁵¹ Vo anitekago, Izesú nana netá alegetatokumú nolane loko loká omikago, agómula lika vemámo tisánemaka, nogómula ale goloutonetatane loko noluve. ⁵² Loko lokago, Izesú láa loko lo amimó: Geza nene vozo. Nenikumú gele alévolé anitímo gelémo zokokaze. Loko noli agepagi, agómula goloutokago ángoake gapoloka Izesuni ámegetoko vimó.

11

Sigaga litanigi ago Izesú Zelusale numutoka vimó

(Mat 21:1-11; Luk 19:28-40; Zon 12:12-19)

¹ Keza vake Zelusalega ali ávatiha niake, Olivi agoka gohalaló nene apá lositá minamó nene Petepage itó Petania loko netoka vi anitemó. Neneloka anitiake, Izesú nene izegipala zuhagutí ve lositá láa loko lo kimike kimisilimó: ² Helega numutoka vi anitiiki toki iza akaleva nagá zinamóma nene, vegená kogohí geko moha onamitimoláa nene, ángiiki vínasiki aliki alizo. ³ Vínasiki aliki nisiko, ve makolímo nanamú niasive nolikoma, láa liki lilizo: Guivahanitémo hoza nego ámina izamú lokago aleko vinogo nousive. Goha imaneloka litá oko amiselekiko aliki anigave, liki li amilizo. ⁴ Loko lo kemekago, vasike ámina toki iza akaleva nene gapo gahevaloka gatetó nagá zinamó ángikasike nivínasasigo, ⁵ gatetó mina vegenalite ángiiake, toki iza akaleva nene nanetakumú nivínasasive. ⁶ Liki likago,

Izesú lo kimi gakó nene li kimikasigo gili ke-memó. ⁷ Lá ikago, keza toki iza akaleva nene Izesutoka aliki vasike, gineganéini nene gololohá ikasike toki iza akalevamámini amegesaló milikasigo, Izesú iteko amupiló minamó. ⁸ Lá oko novigo, vejená mukilite gineganéini gapoló avilisá imi nivago, lugáa nenete kokonasi agila nene gihisigutí hutiki mililiki viki gapoló avilisá imi vamó. ⁹ * Lá niago, goí iká alika miliká a vejenalite gakó napagutí láa liki lamó: Agae, Guivahanímini gakotó anitelimikaninazo, Ómasímo nónohá zegetino. ¹⁰ Avoteho Tevitikitana minati vémo gizapa oketatimoláa Ómasímo lusa geketino. Agae, veletoka okulumakú Ómasi agepoka litune, liki lamó.

¹¹ Lá imi vago, Zelusalega ite aniteake, monó zagusave napagú iteake netá makó ánígomo mohona o asú oake, gamena asú okago, ezagi izegipala zuhamagi Petania numutoka limiki vamó.

Zuta vejenakumú lo vizeko gohuna za usí vizimó

(Mat 21:18-19)

¹² Límugusi zeake gó lokago, Petania numutoka ahuliake nivake, Izesuni gaúna olokago, ¹³ ánígamó nene gohuna za makó hotó neike agila mukí minokago áníhoake gihila zeneihe loko voko ánígamó nene, gihila zeaká gamena alitamigo, agilagó nego áníhoake ¹⁴ za nene láa loko lo amimó: Geza nene gihila makó zemoko gohuna loloko voko noako geikutí nene vejenalite keké namitave. Láa loko noligo, izegipala zuhate ámina gakó gili asú amó.

* **11:9:** Age 118:26

Monó zagusave lo hukoketamó

(Mat 21:12-17; Luk 19:45-48; Zon 2:13-22)

¹⁵ Lá iake Zelusalega vi anitiake, Izesú nene monó zagusaveú itike áminagú moni meina kona ali volaló imaló a vejená kimisele ahuloake, hotó mikasigutí moniló ámina mikasigú moni kimiaká a vetini holoma aleko gululupa soake, Ómasímini guguni gizi amitakumú nama luhusi miliaká a vejenalitini minoaká holoma aleko gululupa soake, ¹⁶ monó zagusave napagú nene netá matá aliki tigá igá amilo loko lo hukoketamó. ¹⁷* Lo hukoketake láa loko lo kimimó: Ómasímo li gako nene monó gotolaú láa liki luhuva gizinamóma neve: Není numunimú haitopaitó vejenalite Ómasiloka liaká numunive liki litave liki gizinamóma neve. Lá onoimóza, lekeza nene alími maketi numuni lilí inamó nene guminaló veta halá giki miniaká geha mulí lilí ikave. ¹⁸ Loko lokago, guguni giziaká ve napagi monó mogona apí-ikimiaká vegi keza nenemú giliake, nana okinake apele helekuko imane suni asú itive liki lamó. Láa liki ligili hagili amóza, vejená mukilite monó lo keme keme okago laga kivisigo sigaga lita mognamú giliake kelegesá legekago nenemú ahulitamó. ¹⁹ Lá okago únaká gamena gamena Izesuge ámina apá ahuliki viaká amó.

Gohuna za osagava vizitímini mogona

(Mat 21:20-22)

²⁰ Neteká gó lokago, nivake, gohuna za nenémo mognagutí osagava vizekago, ánigamó. ²¹ Lá okago, Izesú gako limó nenemú Pítá geleake láa loko

* **11:17:** Isa 56:7; Zel 7:11

lo amimó: Tisao, áningozo. Gohuna za azozá usí vize amenimómámo mota osagava vizeake neve. ²² Loko lokago, Izesú lo kimike limó: Ómasimú gili alévolé ilo. ²³ * Neza lamaná lo likimitoze, gililo. Ve makolímohe makolímohe vozane agoka litá oko zeko akutooko age nagamikú holamane loko litimó nene agata losi gelemoko nolu gakó alévolé inogo ive loko gele alévolé itimó nene, utó o aminogo ive. ²⁴ Lekelisi nene netá nemú manamú giliiki Ómasiloka voká niliki mota alekune liki gili alévolé inikigó litamó nene, alinigave. ²⁵⁻²⁶ * Itó otiki Ómasiloka lita gamena gamena nene, ve makolímini lihima ali minatamó nene ahulalo. Lá ikiko, okulumakú ametipo ámina oko lekelí lihima-tini ahuloleketanogo ive, loko lo kimimó.

*Izesuni zámuzamú loká itamó
(Mat 21:23-27; Luk 20:1-8)*

²⁷ Zelusalega goha atiginá iki iake, Izesú monó zagusave napagú iteko mohona noigo, guguni giziaká ve napagi monó mogona apí-ikimiaká vegi monó gizapa vegi aitoka iake ²⁸ láa liki loká itake lamó: Geza imaneloka netá matá aleaká noanimó nene éahini gakotó lá oaká noane. Éaho lokago aleaká noane. ²⁹ Liki loká imikago, Izesú láa loko lo kimimó: Nezagi gakó hamó loká oleketa-toze. Lekeza li nimikiko neza éahini gakotó imane netá ale utó oaká nouhe nenéa lo likimitove. ³⁰ Zoní monó nagamí holokimiaká hoza alimó nene hikutí ale utó ive. Ómasímini gakotó alihe, itó vegenalitini gakotó alive. Li nimikiko gilitoze.

* **11:23:** Mat 17:20; 1 Koli 13:2 * **11:25-26:** Mat 6:14-15

³¹ Loko loká okimikago, kezáitoka ligili hagili iki láa liki lamó: Okulumakutí ale utó imole loko litunimó nene, íi, lekeza nanamú Zonini gakola gili alévolé amave loko linogo inazo, ³² itó mukí vegenalite Zoní nene Ómasímini agepagutí gakó loaká ve noive liki nilanazo, ámina hoza nene vetinigutí ale utó imole loko losá nene vegenalite nene nana ilitatahe loko lehelele vizekave liki kezáitoka liake, ³³ Izesú li gakokumú láa liki li amemó: Leza nene Zonini mogonala ma gelemune. Liki likago, Izesú láa loko lo kimimó: Láa likima nene netá matá imane aleaká noumó nene éahini gakotó lá oaká nouhe nenegi neza ámina oko lo lekememinogo uve, loko limó.

12

Vain nagá minimú anoza gakó
(*Mat 21:33-46; Luk 20:9-19*)

¹ * Izesú anoza gakó makó láa loko lo kimimó: Ve makolímo vain nagá nene zuhá oake, vego vego oko geisa hize asú oake, gihiláa mí zeko liliká ziti gale legeake, gizapa numuni hána geake, gizapa iki niko meinava likimitove loko vegená makó gutá kemeake mikasi makotoka venoni vimó. ² Voko minake nagá gihila guzá loaká gamena alitokago, geleake nagá gihila mikutí lugáa alenetoko ative loko gelekelé izegipala makó nene gizapa nia vegematoka amiselekago, ³ vo anitimó. Vo anitekago, vain mitó gizapa imina vete apiliake nagá gihila amemake hanuva amisilikago atiginá oko vimó. ⁴ Lá ikago, gelekelé izegipa makó goha amiselekago keitoka goha anitekago, mini gizapa

* **12:1:** Isa 5:1-2

vete gotola ziki hoú nilake gopoguka litamó. ⁵ Lá ikago, makó goha amiselekago, aí nene apili helemó. Lá ikago, goha mukí kimiselekago, vi anitikago, lugáa nene gosohá nogosani kepelemó, itó lugáa nene kipili helemó. ⁶ Lá ikago, agika ami gipala hamokó minamó. Aí nene keitoka alika luma lama zeko láa loko geleake amisilike limó: Není gipa gihila imane amiselekugo ve napámini gipalama okaze liki ániigiiki nene alími lamaná itanigave. ⁷ Loko geleake amisilimóza, vo anitekago, mitó gizapa vete kezáitoka ligili hagili ake láa liki lamó: Imanémo nene mikasi amelahini gipala noinazo, áisi nene minokoko imane hoza ale lá inogo ive. Nenemú mota losé apelekuko helekiko, helisa henoni imane nene lelí loló itive. ⁸ Liki liake, gipalama agizató aliake losé apili hiliake, nagá gihila mikutí hetoka nene gonosíváa ali ahulamó. ⁹ Lá ikamó nenazo, nagá mini amelaho nene nana itive. Áisi okoko mini gizapa vema kepele ahulokoko vain mini nene haitó vete gizapa itave loko lehizeketanogo ive. ¹⁰ Itó imane monó gotolaú gakó láa liki luhuva gizinamóma nene lekeza gatinamóza lakagatí molokahe:

Numuni giaká vete gehani napa makó ániigi ahulamó nenémo geha lapusa alévoleláa loló oake noive. ¹¹ * Ámina netá nene Guivahanímini gakotó utó okanazo, vegenalita ániigokuko lamaná okave.

¹² Láa loko lo kemekago, Zuta vetini monó gizapa ve keza anoza gakokutí gehanimú limó nene Izesuni ániigo ahulunikumú lokave liki gili-

* **12:11:** Age 118:22-23

ake, agizató alinake nagá amitune liki gelemóza, lá itunimó nene vejená vaí iki minamó nenete nana ilitatahe liki kehelele vizekago, ahulimiake hanuva vamó.

Lugupe meina hizeaká gakó
(*Mat 22:15-22; Luk 20:20-26*)

¹³ Zuta ve keza Palisaio monó vejenakutiki Heloteni patigú vejenakutiki ve lugáa nene Izesúma gakó makó lo gopa okiko agizató alitave liki aitoka kimisilikago, ¹⁴ Izesutoka vi anitiake láa liki li amemó: Tisalemaka, geí mogonaka gelenoune. Gakó gihilagó loaká noane. Geza vejenakumú gonukonú osá amane. Géisi vejená iti minamó limi minamó mukitoka Ómasímini gapováa vevesoko lelepizeaká noane. Nenemú lokako gilitune. Loma apatoka agulizaki ve napa Sisani nene takisi moni ameaká nouhá etahe etamive. ¹⁵ Takisi moni kimitupe kememitune. Láa lámó nene amemitune loko lokikoma gamaniloka alémoko voko goní otatune. Itó hanuva amitune loko lokikoma Zuta vejenalite gili golesa itave liki gimivagú milikago, Izesú gakó latímini mogonáa geleake láa loko lo kimimó: Nanamú giminegú milanigi nilave. Moni makó nelepizikiko ániगतove. ¹⁶ Loko lokago, makó alapizikago ániगतake láa loko loká oketake limó: Vogunahana imane itó luhuva imanegi éahini neve. Loko lokago, keza gamani agulizaki ve napa Sisanive liki lámó. Láa liki likago, ¹⁷ Izesú láa loko lo kimimó: Láa likima nene gamanímo voká loaká noi netá nene gamani amilo, itó Ómasímo voká loaká noi netá nene Ómasi amilo. Loko

lokago, vatí oko ale viligoko lo kimikumú sigaga goha litiki minamó.

Hilinitakutí otiakakumú loká itamó
(Mat 22:23-33; Luk 20:27-40)

¹⁸* Satukaio monó vegená lugáa keza hilinakutí otisá amave liki liaká a vegená makolite Izesutoka iake láa liki loká itake lamó: ¹⁹* Tisalemaka, Mosé láa loko luhuva gizo limimóma neve: Ve makolímo izegipa geto molamoko minoko helekikoma, agunalámo ámina gevoná vená alekoko uvolahini hili vemú izegipa geto molative loko loletamóma neve. ²⁰ Lá okanazo, uvolaho agunala 7-a minamó. Lá iake, ganá ve nenémo vená aleake, izegipa getamike helekago, ²¹ agunalámo ámina vená aleake minake, izegipa getamike helekago, agunala makolímo ámináminoko alimó. ²² Itó lá iliki yake ve 7-a nenete ámina venakó ali volaló imaló iki minake izegipa getamake hili asú ikago, venáini nene minake alika hilimó. ²³ Ve 7-a nenete ámina vená ali volaló imaló iki minamó nenazo, hilinitakutí goha otita gamena nene ámina vená nene éahini venala minative. ²⁴ Liki galegutí oteaká gakokumú amé ziki giza itanigi likago, Izesú láa loko lo kimimó: Lekeza monó gotolaú gakó gelemake itó Ómasímo galegutí kelémo oteaká zámuzagi ma gelemake gili gopa ikave. ²⁵ Keza hele vegená otita gamena nene, vená aleakaláa nomive, itó vená alimi kimiakaláa nomive. Okulumakú ageló nenéminiki minanigave. ²⁶* Itó

* **12:18:** Apo 23:8 * **12:19:** Gapo 25:5 * **12:26:** Gá 3:6

hele vejená goha otiaká nenemú neza lo likim-
 itoze. Gozapá nene Mosé eza zamukutí ló gu-
 luma utó okago, ániogoake noigo, Ómasímo gakó
 láa loko limó nene gatiaká niamóza mogona gele-
 mave. Ómasímo nene ká emane amunaló hilina
 vemú nene Moseni láa loko lo ameneimóma neve:
 Neza Avalahani Isakani Zakoponi keí Ómasi min-
 utímina minoloko voko nominuve. ²⁷ Loko limó
 nenazo, nenemú eza kemeni hele vejenalitini
 Ómasi negopa, kemenía hanuva ne vejenalitini
 Ómasi noinazo, Ómasimú gili zaginake hele ve-
 genaki hanuva mina vejenalitini Ómasi noive.
 Lekeza ámina gakó gili gopa goha ikave, loko limó.

Li mila gajokutí napáa
 (Mat 22:34-40)

²⁸ Láa liki lova-leta iki niago, monó mogona
 apí-okimiaká ve makolímo oake gámemé oko ge-
 leake Izesú nene ale lamaná oko ale viligoko lo
 nokimigo geleake, loká otake láa loko limó: Mosé
 lo hukoko li gajokutí hilímo kivilegeko napáa
 neve. ²⁹ * Loko lokago, Izesú láa loko lo amimó:
 Napa nenémo lá oko neve: Lekeza Isilae vese gililo.
 Guivahani Ómasile nene Guivahani hamokó noive.
³⁰ Likigika lekemeni geleastini zámuzatini mukí
 nene Guivahani Ómasitiniloka amilo. ³¹ * Itó gakó
 napa makó nenémo lá oko neve: Gezakamú ge-
 leaká noanimómáminoko gigivekagimú geleko
 gigika kemezo. Loko loketa gajokutí napáa makó
 iteko minamive. ³² * Loko lokago, monó mogona

* **12:29:** Gapo 6:4-5 * **12:31:** Liv 19:18 * **12:32:** Gapo 4:35

apí-okimiaká vemámo láa loko lo amimó: Tisale-maka, gako nene lamaná lokane. Nene gelekugo etokave. Ómasi hamokó noive, Ómasi makó nomive. ³³ * Itó ligika nemó gele vevesoakate nemó zámuzate nemó mukí aitoka amitunimó itó lezatemú geleaká nounimómáminoko ligivete-gikumú geleko ligika kimitunimó nenémo Ómasi guguni gizo ameká netá haitopaitolímini nene avilegekave. ³⁴ Loko gele vevesoko lokago, Izesú geleake láa loko lo amimó: Ómasi alémo geí gizapa ogetati ve loló itani gamena nene hotó nomive. Loko lokago, giliake, netá makokumú goha loká itatakumú kelegesá legekago, loká itamamó.

Gologí oketative loko lo moloketa vemú loká oketamó

(Mat 22:41-46; Luk 20:41-44)

³⁵ Izesú monó zagusave napagú monó lo keme keme noiike láa loko limó: Monó mogona apí-ikimiaká vete nene gologí oleketative loko lo mololeketa ve nene agulizaki ve napate Tevitini agávolaho noive liki nanamú liaká niave. ³⁶ *

Tevití eza Ómasímini Sikalahú nenémo agikagú alémo vávani okago láa loko limó:

Mezaú ve eza není Guivahaníne nene není nigizani zamagaloka minoloko voko noako, mukí gala vega nene gigisa lapuvauka ahuloketanogo uve loko lo amimóma neve.

³⁷ Tevití nene gologí oleketative loko lo moloketa vemú nene Guivahaníneve lokamó nenazo, gologí oletative loko lo molota vémo nana igo Tevitini agávolahogó noitive. Tevitini agapilamola

* **12:33:** Hos 6:6 * **12:36:** Age 110:1

noitimóza, Tevitini ve napagi noitive. Loko Izesú noligo, alegesá iki mina vegená mukí nenete gili-ake laga kivisimó.

Monó mogona apí-ikimiaká a vemú alévolé oko lo hukonoimole

(Mat 23:1-36; Luk 20:45-47)

³⁸ Izesú nene monó lo nokimike miní ameko láa loko lo kimimó: Monó mogona apí-ikimiaká vemú, ehe. Kugupeló netá hána luhatatumú itó maketiloka mihina niago vegená makolite gekéváké likitatakumú, ³⁹ itó monó numukú numukú nene vegená mukilitini kovogisalo minoaká holomaló minatakumú, itó nosánetá napa ninató nene agepaló siakumukó nene netakumú kumu heleaká noive. ⁴⁰ Keza gevoná venalitiní henokanoni gumina ali asú iká itó kegepatunú soza miliki agepoka hána liki Ómasiloka liká iaká nianazo, ámina ve nenete miniki lihimá napa genavagi alinigave, loko limó.

Gohogó vená gevoná ahula moni

(Luk 21:1-4)

⁴¹ Izesú eza monó zagusaveú nene moni miliaká pokisi gahevaloka minake, vegená mukilite ámina pokisigú moni nimilago ángo minamó. Ángo noigo, henóinigi vegená mukí nenete moni mukí miliva miliva niago, ⁴² gohogó vená gevoná makolimo oake golohá moni koma lositá nene pokisimagú ahulamó. ⁴³ Lá okago, Izesú nene izegipala zuha sele lo kemeake láa loko lo kimimó: Neza lamaná lo likimitoze, gililo. Vegená mukí imanete vaí iki milina monigutí nahulamóza, gohogó vená gevoná imanémo gohogó noikutí netá

matala mukí nosánetá meina hizitimoláa ahulo asú okave. ⁴⁴ Nenemú gohogó vená imanémo moni miliaká polisigú ahula monimámo mukí vegenalitini moni avilegeneimó gelekave, loko limó.

13

*Alika monó zagusave ali golesa itakumú limó
(Mat 24:1-2; Luk 21:5-6)*

¹ Izesú nene monó zagusavegutí nolimigo, izegipala zuhagutí makolímo láa loko lo amimó: Tisalemaka, ániгоzo. Imane geha numuni lagámini ali tolova iki ginamó neve. ² Loko lokago, Izesú láa loko lo amimó: Áimáa numuni napa imanemú nolape. Itína nene ha nego nánigamóza, minoko lova gala ve keza imaneló gehani apiliki tele vizikiko gehani nene amupiló amupiló iki mililiki itekutí gululupaso asú inogo ive.

*Miluma gilituni gamenámini ganá netá
(Mat 24:2-14; Luk 21:7-19)*

³ Loko loake, Izesú nene izegipala zuha Olivi agokaloka kelémoko iteake, monó zagusave helegaloka nego, neneló minake, Pitá Zemusí Zoní Etulú kezagó Izesú noitoka vake loká itake lamó: ⁴ Itína netakumú lanimó nene nanahé gamena utó itive, itó lani gamena nene alitanogo noiko nana anosa utó okiko ániगतune. Lo lemezo. ⁵ Liki likago, Izesú láa loko lo kimimó: Ehe, gizapa ilo. Ve makolímo lokogoka vizekatize. ⁶ Vegená mukilite nanitiki není nugulizató liki okulumakutí lumu ve gihila nezama nouve liki vegená mukí kogoka vizinigave. ⁷ Lekeza haitopaitó lovámini gakola nigiliki itó lovatini konó nigiliki nene mulutini

itemino. Ámina netá utó itimóza netá matá velesá asú aminogo ive. ⁸ Numutó namató vegená makó nenete gala venini lova ali nikimiko, agulizaki ve makolímíni zuhagi itó makolímíni zuhagi lova hizinigave. Itó mukí mikasiuka imimá noiko gaúna gamena mukí utó itimóza, ámina netá utó itimó nene venalite izegipa getanigi miluma giliaká niamó nenémíni oko utó inogo ive.

⁹ * Lá onoize, lekelisi gizapa keké viziki ilo. Gakó hoza alilikimiiki gonitó likilímiki vinigave. Itó monó numúikú numúikú nene segi nogosan-itunú likipilitamó neve. Není nugulizá lekelitoka minakumule liki kugulizaki ve napatini itó kiapegini kovogisaló likilími milikiko keí kovogisaló oti miniki není mogona li kiminigave. ¹⁰ Lá itamóza, gamena litá oko asú aminogo ive. Goí oko Ómasímíni gakó lamaná nene numutó namató puu loko vitive liki li hutilí i asú inigave. ¹¹ Likigizató aliki likilímiki viki goní ilikitata gamena nene, nanave loko litupe liki lakagata gili-liko gena amino. Gamena nene zupa Sikalahulímo likigikagú gakó mololikimikiko áminagó nene lilo. Lélisi lupe lamiki Sikalahulímíni gakó loló ino. ¹² Ámina zupahé nene uvolaho makolímó agunala agizató alekoko goní omikiko agunala nene apili hilingave. Amelaho nene gipala agizató alekoko goní omikiko nene gipala apilingave. Izegipáini nenete izóikini améikini lova ali kimiiki likiko izóikini améikini kipili hilingave. ¹³ * Není nugulizá lekelitoka minakumule liki vegená mukilite mukahá likipilinigi niamóza, vegená

* **13:9:** Mat 10:17-20; Luk 12:11-12 * **13:13:** Mat 10:22

makolite gamenáini asú amititó monó ahulamiki alévolé iki vitamó nene Ómasímo kugutó vizinogo ive.

Miluma geleaká gamena napa
(*Mat 24:15-28; Luk 21:20-24*)

¹⁴ * Minoko lekeza nene mu likizapa iti netá golesa nene minamoaká apatoka apá ale golesa oaká netá nenémo oteneiko ánígatave. [Imane gakó gatanimó neneka imane nolu gakokumú gele guni ozo.] Ámina gamenaló Zutaia mikasiuka nita vejená nene golisi iliki agokaloka ititakumule.

¹⁵ * Keí numupitó nita vejená nene golisi iliki limiki numúikú henoníini ma aliki vamitakumule.

¹⁶ Itó mikú noiti ve nenémo luhoaká gó alitove loko numunaloka atiginá oko vamitikumule. ¹⁷ Kee, izegipa kagatupagi nita venaki izegipa namuni aminí nikimita venaki nene ámina gamenaló nene nana itamó neve. ¹⁸ Lekelisi nolu netá nene golini gamena utó amitive liki Ómasiloka liki minalo. ¹⁹ * Ámina gamenaló genavagi netá utó itimó nenémo Ómasímo apí oko netá matá ale utó i gamenalotí emane utó osá ami netá nene minoloko itike itike imane gamenaló utó amive. Nolu gamenaló utó okoko nenémini veletó goha utó aminogo ive. ²⁰ Guivahanímo ámina miluma gilita gamena ale atuhá amitimó nene, vejená makó ma kavasavagi minamitamó nemóza, kelémo etó onoi vejenakumule loko ámina gamena nene ale atuhá inogo ive. ²¹ Nene gamenaló ve makolímo ángalo, gologí oletati vema imaneloka utó okave,

* **13:14:** Tan 9:27, 11:31, 12:11 * **13:15:** Luk 17:31 * **13:19:** Tan 12:1; Ali 7:14

itó ánígalo, volaneloka utó okave loko lo likim-
itimó nene, ámina gakó gili zagemilo. ²² Ámina
gamenaló nene gologí oleketati ve sozámíni itó
Ómasímíni agepagutí gakó liaká ve sozámíni utó
iiki vegenalíte sigaga lita netaki soza avevezaha
sunigi aliiki Ómasímo kelémo etó onoi vegená ko-
goka vizitupe liki lá inigave. ²³ Ehe, nolu netá nene
utó onamigo mota lo lekeme asú okuve. Nennemú
gizapa alévolé iki minalo.

Okulumakutí ve gihila atiginá iti gakó
(*Mat 24:29-31; Luk 21:25-28*)

²⁴ * Ámina gamenaló ámina genavagi netá asú
okiko, ho noiteko litá oko límugusi zekiko ikanímo
hize sata amiko, ²⁵ * sonohí nenete okulumatotí
atohiki velehé nilimiko, okulumakú amuzavagi
netá mómoká i asú niko ²⁶ * okulumakutí lumu ve
gihila neza zámuzánegi itó lapanánegi nene límusi
amupiló nolumugo ániganigave. ²⁷ Lá okiko, agel-
ogini kimiselekugo, kelémo etó onou vegená ho
noititokatí ho nolimitokatí itó ezega emegatí itó
mikasi nekisa vokisaukatí kilími nupa inigave.

Gohuna zámíni anoza gakó
(*Mat 24:32-35; Luk 21:29-33*)

²⁸ Gohunagitana zamú anoza gakola nemó nene
gili vevesiki gililo. Izanámo nene nagamila nego
agila guluma sekago lekeza ánígiake ho gamena
mota alitokave liki giliaká niave. ²⁹ Itó ámináminiki
lo lukumu netá nene utó noiko ániigiiki ve na-
pate nene gatekú omo ávatiha okave liki litaze.

* **13:24:** Zoe 2:10,31; Ali 6:12 * **13:25:** Isa 34:14; Ali 6:13

* **13:26:** Tan 7:13

³⁰ Neza lamaná lo likimitoze, gililo. Imane game-naló nia vejená velesá hili asú inamiko nolu netá mukí nene utó inogo ive. ³¹ Okulumaki mikasigi tolova itáiha, není gakó nene ma gopa oko tolova aminogo ive.

Gamena napamú gelemune
(*Mat 24:36-44*)

³² Lá onoimóza, ámina gamenamú ve hamoláate keké gelemave, itó okulumakú ageló keza ma gelemave, itó Ómasímini gipala noutímina ma gelemuve. Améneho hamokó áisigó geleneive.

³³ Ato gamenamú lekeza ma gelemanazo, ehe, gizapa i guni iki minalo. ³⁴ * Lá oko neve. Ve makolímo venoni vinogo nooko numuni apala ahuloko vinogo noike gelekelé izegipala nene mukí hoza nene etó etó oko kigizakú moloko netá matalaló gizapa initatave loko ahulokimiake gatetó gizapa ve nene gizapa oko minozo loko lomiake vimó.

³⁵ Nenemú numuni amelahoma ati gamena nene gánavaló ahe akovevé ahe gó anuva noikohe gokululuva notovoikohe lekeza ma gelemanazo, nenemú gizapa i guni iki minalo. ³⁶ Lokovó akiniko galinali oko ángolikimikatize. ³⁷ Lo nolukumu gakó nene lekelikumukó lamuve, vejená mukikumú noluze. Lekeza nene gizapa iki minalo, loko limó.

14

Monó gizapa vete Izesuni apilinigi lova gizamó
(*Mat 26:1-5; Luk 22:1-2; Zon 11:45-53*)

* **13:34:** Luk 12:36-38

1 * Avóikini asenini zeketakumú gili mina holisigú lulu vizemi peleti niaká a holisi alitokago, gamena lositá ha nego, guguni giziaká ve napagi itó monó mogona apí-ikimiaká vegi keza láa liki lamó: 2 Vegenalite lova napa ali utó iki lipilikatanazo, holisigú nene Izesuni apelemítune. Lá onoinazo, asuguná oko Izesuni agizató aleko apele hilitune liki gakó liki liake nenémini gapomú vitagá amó.

Petania numutoka Izesuni anuva lamanaki uveli holotamó
(Mat 26:6-13; Zon 12:1-8)

3* Lá noigo Izesú nene Petania numutoka noike Saimon eza halamé netá gizaleake minake zoka vémini numukú iteko nosánetá noko noigo, vená makolímó gehanigitana goni aleake, agepáa zeko ategeake áminagú nene anuva lamanaki uveli agulizá nalita nene meinava iteko mina netá nene Izesuni gotolaló leketamó. 4 Lá okago, ve lugáate mulúikú golesa okago, kezáitoka lamó: Uveli lamaná nene nanamú latila ive. 5 Ámina uveli nene hanuva minalina meinaváa moni 300 kina alekinake gohogó vegená kumutiline. Liki liake gahá amikago, 6 Izesú geleake láa loko lo kimimó: Ahulitalo. Nana igo gena gakó li nameve. Vená imanémó netá lamaná alenimikago etokave. 7 * Gohogó vegená keza lekelitoka gamena hána miniliki viki minanigi anazo, kelémó lamaná itune liki nene kilími lamaná itamóza, neza lekezagi minoloko voko minaminogo uve. 8 Ezáa loló itove loko agata gili netá nene loló okave. Alika nénisi

* 14:1: Gá 12:1-27 * 14:3: Luk 7:37-38 * 14:7: Gapo 15:11

helekugo gonosi milimiligú gale zinitatakumú agata geleake nugupeló anuva lamanaki uveli holonimikave. ⁹ Neza lamaná lo likimitoze, gililo. Makó mikasiuka není gakó lamaná imane li utó iki li kimitató li kimitató nene imane venalímini mogonamú gili zagitave liki eza loló oneta sunimuki li kiminigave, loko limó.

*Zutá Izesuni amimika litove loko lo hutamó
(Mat 26:14-16; Luk 22:3-6)*

¹⁰ Lá okago, Izesuni izegipala zuha keikutí ve makó agulizá Zutá eza Kaliotó apatotí ve nenémo guguni giziaká ve napa niatoka vike Izesuni amimika loko alémoko oko likigizakú ahulatove loko lo kimimó. ¹¹ Lo kemekago, giliake, mulúikú lamaná okago, age nonó lá oko gimitune liki Zutani agómulaló li hutikago, geleake Izesuni amimika linogo amapani molamó.

*Izesú izegipala zuhagi asenini zekimiaká nosá namó
(Mat 26:17-25; Luk 22:7-14, 21:23; Zon 13:21-30)*

¹² Lulu vizemi peleti niaká a holisímini ganá gamena nene avóikini asenini zeketakumú gili minake sipsip iza akaleva apiliaká a gamenaló nene, izegipala zuhate Izesuni loká itake lamó: Asenini zeketakumú gele minoaká holisímini nosánetá nene hiláauka viki ali yavá initatave loko nolane. ¹³ Liki likago, izegipala zuhagutí ve lositá nene nokimisilike láa loko lo kimimó: Zelusalega nani-tisiko ve makó eza paisele somo nagamilagi geheneike gapoló hotu nilikima nene ámina ve ámegetiki vilizo. ¹⁴ Lá iki viki ámina ve nene numukú itekiko numuni amelahini láa liki li amilizo:

Tisalémo nezagi izegipáne zuhagi asenini zekimi-aká nosá natuni numuni agika hiláauka neve loko lokago nousive. ¹⁵ Liki likisiko, numuni agika veletó nego netá matá avilisá ohá lekelepizekiko neneló nosánetate ali vavá ilizo. ¹⁶ Loko lo kemekago, izegipala losima keza gili alikasike taoniló vi anitikasike ángigasimó nene Izesú lo kimimómáminoko nego ángikasike asenini zekimiaká holisímuni nosá ali vavá asimó.

¹⁷ Lá ikasigo, límugusi zekago, Izesú nene izegipala zuha 12-agi ali nupa iake, ¹⁸ * nosánetá niki niake, Izesú láa loko límó: Lamaná lo likimitoze, gililo. Lekelikutí nosánetá nonuhakutí ve makolímo nimimika linogo ive. ¹⁹ Loko lokago, keza miluma nigeleke hamopamó li amiki nenikumú nolape. ²⁰ Liki likago, eza láa loko lo kimimó: Ve 12 lekelikutí hamó lapegutí peleti nagamí zeko natí ve nenémove. ²¹ Okulumakutí lumu ve gihila nenikumú monó gotolaú luhuva gizinamómámini oko hilito gapogú novumóza, nimimika loko nelémoko viti vema agae, lihima sipisi alinogo ive. Izolaho aí getamilina nene vávani oko minaline, loko límó.

Lepa nosá apí oko kimimó

(Mat 26:26-30; Luk 22:15-20; 1 Koli 11:23-25)

²² Nosánetá ninake Izesú nene peleti aleake Ómasi agepoka loake gitegeko nokimike láa loko límó: Aliko nalo. Imane není mémeláne neve. ²³ Loko loake vain goni aleake Ómasi agepoka loake, kemekago, nenegutí mukitó ninago, ²⁴ * láa loko lo kimimó: Lo múnahéaká gakolímini golaníne

* **14:18:** Age 41:9 * **14:24:** Gá 24:8; Zel 31:31-34

nene vegená mukikumule loko lekitomó imane neve. ²⁵ Lamaná lo likimitoze, gililo. Vain gihi-lagutí goha naminake minoloko vinake Ómasímini agulizaki vetipo loló oleketato gamena nene vain nagamí haitolímini natove, loko limó.

*Izesuni Pitá egamega otatikumú lo utó imó
(Mat 26:31-35; Luk 22:31-34; Zon 13:36-38)*

²⁶ Láa loko lokago, monó nama makó liake limi-
iake, Olivi agoka agisauka anitiake, ²⁷ * Izesú
láa loko lo kimimó: Monó gotolaú nene Ómasímo
li gakó nene láa liki luhuva gizinamóma neve:
Gizapa ve apelekugo sipsip iza nene hutilí iki
golisi inigave. Liki gizinamóma nenazo, lekeza
mukitó není visilinitanigave. Lá onoitimóza, ²⁸ *
helekugo goha nelémo otekiko, Galilaia mikasiuka
goí o likiminogo uve. ²⁹ Loko lokago, Pitá láa
loko lo amimó: Neza viselegetamitove. Keza muk-
itó gele alévolé oakáini nene gologolo sokikoma
nénisi nene lá aminogo uve. ³⁰ Loko lokago, Izesú
láa loko lo amimó: Lamaná lo gimitoze, gelezo.
Itína holugú nene okolohomámo anó losi molon-
amiko nenikumú ánigamuve loko gamena losive
makole egamega onetanogo ane. ³¹ Loko lokago,
Pitá pigi vizeko limó: Neza geikumú egamega
ogetaminogo uve. Nipili hilinigi niko, gezagi
helekusigoma nene lá ogetaminogo uve. Loko
lokago izegipa zuha mukitó keza alími vatí ake
ámina gakokó lamó.

*Izesú Gesemane zazuha gú Ómasiloka limó
(Mat 26:36-46; Luk 22:39-46)*

* **14:27:** Zak 13:7 * **14:28:** Mat 28:16

³² Lá ikago, apá makó agulizá Gesemane loko neneló vi anitiake, izegipala zuha láa loko lo kimimó: Lekeza imaneló niko neza voko Ómasiloka litoze. ³³ Loko loake, Pitanigi Zemusinigi Zoninigi kelémoko voake, Izesú nene mulunagú peisi nozigo miluma geleake, ³⁴ láa loko lo kimimó: Mulúnegú gónupa geake hilitomó noize, lekelisi nene imaneloka miniki gizapa iki minalo. ³⁵ Loko loake, koma minomo novike mikasigú agoka nohizike Ómasiloka láa loko limó: Aménega, genavagi gihito netá imane gelekako nivilege vitive loko noluve. ³⁶ Loko nolike láa loko limó: Aménegamaka, geza mukí netá loló itove loko gagata gilitani netá nene vávani okogó loló itanimó nenazo, genavagi gihinitata netá imane nenitokatí ale olové itane loko nogulumóza, není nigikaloka molamoko geí gigikaloka nelémo molatane loko noluve. ³⁷ Loko loake, oake izegipala zuha ánígamó nene, kovó akinago áníhoake, Pitani alémo oti ke láa loko lo amimó: Saimon geza akonape. Geza gamena koma gizapa oko ote minamitape. ³⁸ Lekemekú milatakumú gopa ikatanaze, gizapa iki miniki Ómasiloka liki minalo. Likigikámo vávani noimóza, lukugupémo gena noive. ³⁹ Loko lo kemeake, goha vike ámina gakó like Ómasiloka loake, ⁴⁰ atiginá oko ánígamó nene, kogómula ahihí okago kovó akinago áníhoamó. ⁴¹ Lá okago anotó aliki li amita gakokumú vitagá amó. Goha ago nene losive makole okago, Izesú lo kimike limó: Lekeza lakavasú viziki hanuva aki niminahe. Ánesile. Gilinahe. Okulumakutí lumu ve gihila neza

lihimáinigi vetini kigizakú nimimika liki nilími milata gamena mota alitokave. ⁴² Otilo, mota vitunize. Ánigalo. Nimimika liti vema mota alitó okave.

*Izesuni amimí okago alemó
(Mat 26:47-56; Luk 22:47-53; Zon 18:3-12)*

⁴³ Láa loko lo kemeko noigo, izegipala 12 keikutí kigivéipo makó Zutá noago, vejená mukí keza ámegetiki niake geleka hosigi sopolo hánagi ali minake amó. Keza nene guguni gizia ká vegi monó mogona apí ikimiaká vegi monó gizapa vegi keza emane amunaloka kimisilikago, ⁴⁴ nivake amimika liti vemámo gakó makó láa loko limó: Novinake ve makó agoka legeko nonugo nene ánigilki ámina ve noive liki agizató aliki gizapa itiki alímiki vilo. ⁴⁵ Loko loake ake, Izesú noitoka litá oko vo amatoka aniteake, oho, tisatehove nolike agoka legeko namó. ⁴⁶ Lá okago lova ve nenete ake Izesuni agizató ali gikitiki alemó. ⁴⁷ Lá niago, amatoka mina vejenakutí makolímó aí sopolo hána nene golagutí segeake guguni gizoaká ve napámini gelekelé izegipala apilike agata zeko isimó. ⁴⁸ Lá okago, Izesú nene lova vema láa loko lo kimimó: Neza nene laskoli nougo sopolo hánagi itó geleka hosigi aliki niake nigizató alitune liki niahe. ⁴⁹ * Gamena gamena lekezagi monó zagusave napagú minuke monó lo keme keme oko minumómaló nigizató alisá amamó nehe. Lá ikamóza, emane amunaló nenikumú monó gakó luhuva gizinamó nene alévolé itive loko netá imane utó okave.

* **14:49:** Luk 19:47, 21:37

⁵⁰ Loko lokago, izegipala zuha nenete ahulimiake golisi hutilí iki vamó.

Makí golisi vimó

⁵¹ Lá ikago, gosohá ve makolímo gó gizopa agupeló likeake Izesuni nene ámegetoko novigo, ámina ve nene agizató alikago, ⁵² góma nene gololohá oko ahulo kigizakú oake agupe zapakó golisi vimó.

Kansoletini kogómulaló Izesuni goní itamó

(Mat 26:57-68; Luk 22:54-55,63-71; Zon 18:13-14,19-24)

⁵³ Lá okago, Izesuni nene guguni gizoaká ve napa noitoka alímiki vikago, guguni giziaká ve napagi itó monó gizapa vegi monó mogona apí ikimiaká vegi alegesá iki minakú alímiki itemó.

⁵⁴ Izesuni alímiki nivago, Pitá nene hotó otigí oko kémegetoko vike, guguni gizoaká ve napámimi hé numunagú áneneló iteko ámina vémini gelekelé izegipategi minake lotó agupe lotá oko minamó.

⁵⁵ Lá noigo, guguni giziaká ve napagi keí kansolegi mukitó nene Izesuni apele hilitune liki soza hakupá gakóinimú vitagá amóza, ⁵⁶ hakupá gakó la ve nenete gakóini hamó lamamó. Mukí liki amupesamó nenazo, ali utó amamó. ⁵⁷ Makolite otiki hakupá gakó aikumú láa liki lamó: ⁵⁸ * Eza nene monó zagusave napa kigizanitunú ginamóma imane zeko tele vizekinake, gamena losive makole noviko goha nigizanitunú gemitoha hanuva lokugo utó inogo ive loko noligo gulunimole. ⁵⁹ Liki lamóza, gakóini nene hamó gapoló vamigo, ⁶⁰ guguni giziaká vetini ve napáini nenémo holúikú oteake Izesuni loká otake goní

* 14:58: Zon 2:19

nigitake nila gakotó geza ale viligoko lo kimi-tani gakó ma nomihe. ⁶¹ Loko limóza, Izesú nene agepa apizeake minake gakó ale viligoko lo amemigo, guguni giziaká vetini ve napa nenémo goha loká otake limó: Geza gologí oletatane loko lo mola vema Ómasi agepoka loaká nouhámámini gipala noape. ⁶² * Loko loká omikago Izesú limó: Oo, nene mota nolane. Itó makó lo likimitoze, gililo. Okulumakutí lumu ve gihila neza amuza vémini agizani zamagaloka nougo, itó okulumalímini límusigú nolumugo ániganigave. ⁶³ Loko lokago, guguni giziaká vetini ve napa nenémo gele golesa oake luhoaká gola aleko polo noligike vegenala zuha láa loko lo kimimó: Gakola gilina vegená makó nanamú sele lokinake gakó goha lokiko gilitune. ⁶⁴ Ómasi avilegeko li gakó mota gilikaze. Nenemú lekeza gilikago nana onoive. Loko lokago, keza mukilite nakahunímini gakó lokaze, mota losé apilitune liki li hukitake, ⁶⁵ lugáate gituhú itake agoka agepaló nihitake kigizanitunú napeleke lamó: Geza gakó mogona lo utó oaká ve noítanimó nene, éaho nogipilihe lo utó oko lo lemezo. Liki likago, gelekelé izegipáinimate kigizanitunú apelemó.

Pitá Izesuni egamega otamó

(Mat 26:69-75; Luk 22:56-62; Zon 18:15-18,25-27)

⁶⁶ Lá niago Pitá nene hé numuni amunaloka noigo, guguni gizoaká ve napámini gelekelé mohola makolímo oko ánigamó nene, ⁶⁷ Pitá nene agupe ló lotá oko noigo, ángoake gonú napilike

* **14:62:** Tan 7:13

geza nene Nasalete numutotí ve Izesuki mini-aká niasi vema noane. ⁶⁸ Loko lokago, Pitá eza egamega ike gakó lanimó nene ma gelemuve, itó mogonáa gele vevesamuve. Loko loake, gatekú nolimigo, ⁶⁹ ámina gelekelé mohó nenémo aí goha ángoake alegesá iki mina vegeináma lo kimike ve imane Izesuni zuhagutí noive. ⁷⁰ Loko lokago, goha egamega hulupaváa imó. Lá okago, gamena komáisi neigo áminaló oti mina vegeçalite Pitani goha láa liki li amemó: Géisi Galilaia ve noaninazo, géisi lamaná Izesuni zuhagutí noane. ⁷¹ Liki likago, eza Ómasímini avogisaló lo hutoko lamaná noluze, soza litomó nene Ómasímo usí vizenimikátize, lekeza gakó nila ve nene ángonamu vemú nilave, loko limó. ⁷² Loko noli agepági okoloho nenémo goha anó molamó. Anó molokago, Pitá nene Izesú lo ami gakó nene, okoloho nenémo gamena lositá anó molonamiko není ángonamuve loko egamega onetanimó nene gamena losive makole inogo ive loko amunaloka lo ami gakó goha geleake ive napa imó.

15

*Izesuni Pilató noitoka alímiki vamó
(Mat 27:1-2,11-14; Luk 23:1-5; Zon 18:28-38)*

¹ Neteká ho noitigo, guguni giziaká ve napagi monó gizapa vegi monó mogona apí-ikimiaká vegi monó kansole ve mukí kezagi lova gizi hutiake Izesuni nene nagá zimiake alímiki vake Pilatoni agizakú milamó. ² Lá ikago, Pilató nene Izesuni ángoake loká otake geza nene Zuta vetini kugulizaki ve napáini noape. Loko loká omikago,

eza láa loko lo amimó: Nene gezaka mota lokanimole. ³ Loko lokago, guguni giziaká ve napa-mate mukí netakumú goní imikago, ⁴ Pilató goha loká otake limó: Geikumú gakó genavagi nilamó nenazo, geza gakó ale viligoko lo kimitanimoláa ma nomihe. ⁵ Loko loká omikago, Izesú gakó ale viligoko lo kememigo Pilató nene agata gululusi gilimó.

Izesú hilitive liki goní itamó

(Mat 27:15-26; Luk 23:13-25; Zon 18:39–19:16)

⁶ Kiapé eza Zuta vetini avolagini asenini zeketakumú gili mina holisigú meleketó meleketó nene Zuta ve keza aseva zetatane liki ve makolímíni agulizá ikago, agulizaki ve nenémo nagá numukú ahulikita ve kimisele ahuloká ahuloká okago, ámina ve nene numúitoka viaká amó. ⁷ Lá imó nene gamena nene zupa ve makó nagá numukú minamó, agulizá Palapasí. Áisi nene vejená lugáa kelémo vatí ike gamaniloka lova gizakú nene ve makó kepele hilimó nenazo, nagá numukú ahulimikago minamó neve. ⁸ Lá okago, vejená mukí nenete Pilató noitoka vake eza aleaká imómáminoko alitive liki loká imikago, ⁹⁻¹⁰ guguni giziaká ve napa nenete Izezukumukó amekugú niki miniake gonitó alímiki vakumú nene Pilató geleneike láa loko lo kimike limó: Láa likima Zuta vetini agulizaki vetipo nene aseva zemikugo lekelitoka vitive liki nilahe. ¹¹ Loko limóza, guguni giziaká ve napa nenete vejená mukilitini mulúikú hizikago ¹² aitotí Palapasini aseva zetamane liki likago, Pilató goha lo kimike limó: Zuta vetini kugulizaki véini

noive liki liaká nia vemú nene nana otatove.
¹³ Loko loká okimikago, goha gopaga liki zohota zaló hilitikumule. ¹⁴ Liki likago, Pilató nene nanamú. Nana netá golesa alekago nilave. ¹⁵ Loko lokago, keza goha gopaga liki likago, Pilató nene ali nupa imina vegeñalitini mulúikú hulu itive loko Palapasini gologí omikago keitoka vimó. Itó Pilató lokago, Izesuni nene segi nogosanitunú apiliake viki zaló nilitunú ziki apili hilitave loko kígizakú molamó.

Ami vete Izesuni gopoguni militamó

(Mat 27:27-31; Zon 19:2-3)

¹⁶ Lá okago, ami vemate agulizaki ve napamámini numuni holutó nene Izesuni alímiki iteke ami ve lugáa mukí kilími nupa ake, ¹⁷ agulizaki vegitana lilí itake okohu gó luhimiake gasovagi nagatunú akilí lilí iki gotolaló hitimiake, ¹⁸ amé ziki geké litake oga mokáneve, Zuta vetini kugulizaki vénimave. ¹⁹ Liki liake, akepa nogosanitunú gotolaló ziake gituhú nitake agisagú gupá nizeke soza miliki agoka agaka vizemó. ²⁰ Lá ake gopoguka li asú itake okohu gó luhitamó nene gololohá iki ali miliake ezáa gola luhimiake, zohota zaló nene nilitunú ziki apili hilinigi alímiki vamó.

Izesuni zohota zaló apelemó

(Mat 27:32-44; Luk 23:26-43; Zon 19:17-27)

²¹ * Lá iake gapoló nivago, ve makó agulizá Saimon eza Apilika mikasiuka Sailini apatotí ve Alesaté itó Lupú keí améipo nene minaukatí noago, hotu liake gala vizikago, Izesú geheko vi

* **15:21:** Lom 16:13

za nene alémo vatí oko gehetoko vimó. ²² Lá noigo, alímiki vake apá makotoka agulizá Goligota loko, lelí gakokutí nene gotóini gonosi helisa apale loko neneloka anitiake, ²³ Izesú native liki vain nagamikú nene miluma gelemiti lusa netá makó agulizá mulu nene miliki ali gopa iake amemóza, namimó. ²⁴ * Namigo, zohota zaló nene apiliki apatiake gineganeva gona miliki aliki éaho alitihe éaho alitihe liki satu zohí amó.

²⁵ Lá iki apelemó nene gó loake ho ite alévolé noigo, zaló apiliki apatemó. ²⁶ Lá ikago, nakahunímini gakó luhuva nene Zuta vetini kugulizaki véinive liki giziake apatemó. ²⁷⁻²⁸ Itó laskoli ve geligeli ve makó nene agizani sogaloka apatemó, itó makó nene agizani zamagaloka apiliki apatemó.

²⁹ * Lá ikago, vegená vigá igá amó nenete gotóinitunú goké goké nizeke amé ziki gopoguka litake láa liki lamó: Oho, monó zagusave zeko tele vizekinake gamena losive makolegó oko vokiko goha gitove loko loaká anitika, ³⁰ gugutó vizeko zohota za ahulokoko lememané. ³¹ Liki nilago, gugini gizoaká ve napagi monó mogona apí ikimiaká vegi keza hamolímini iki amé ziki gopoguka litake kezáitoka láa liki lamó: Vegená lugáa kelémo kugutó vizeaká noimóza, ezáa nene alémo agutó vizemitimó okave. ³² Eza nene Isilae ve lelí gologí olimiaká ve itó lelí agulizaki ve noitimó nene itínasa zohota zalotí apasoko lemekiko, áinigokinake gakola gele alévolé ituninazo. Liki likago, keza

* **15:24:** Age 22:18 * **15:29:** Age 22:7, 109:25; Mak 14:58; Zon 2:19

luga luga zohota zaló kipiliki apate ve nenetosa áminámini iki kilími vatí asike amé zitigí iki lasimó.

Izesú hilimó

(Mat 27:45-56; Luk 23:44-49; Zon 19:28-30)

³³ Holisakatotí mukí mikasiuka límugusi ze asú oake mino-loko novigo únaká ho nene ale zohota imó. ³⁴ * Ho ale zohota noigo, Izesú pigi vizeko ezáa gakokutí nene Eloi, Eloi, lama sapakatani loko limó nene lelí gakokutí nene Ómasinemaka, Ómasinemaka, geza nanamú viselenimikane. ³⁵ Loko lokago, amatoka mina vejená lugáate nene gakó giliake láa liki lamó: Gililo. Ómasímini agepagutí gakó loaká ve Ilaizani sele nolive. ³⁶ * Liki liake ve makolimo ololu loko vike notunigitana netá legeake akepa lolovaló hizeake ekesá vain nagamikú lupizeake ale oteko Izesú native loko amimó. Namike láa loko limó: Ánigatune. Ilaizá oko apasotatihe loko gizapa onoítune. ³⁷ Loko lokago, Izesú gakó napagutí like, ahuu lo nahulake hilimó. ³⁸ * Lá okago, monó zagusave napagú Ómasímini avogisaló itiaká nia gatetó zi lí ika lavolavo nene velekutí zeko hoú loloko limike ale luga luga imó nene lelí gahe ale koló imó. ³⁹ Izesú nene ahuu lo nahulake helekago, ami vetini gizapa vémo Izesuni agómulaló noiike imane ve nenémo lamaná Ómasímini gipala minamó neve, loko limó.

⁴⁰ Itó vená lugáate hotó otigí iki oti minake ángi minamó. Keikuka nene Magatala numutotí vená Maliá minamó, itó Maliá makó eza Zemusí komáa

* **15:34:** Age 22:1 * **15:36:** Age 69:21 * **15:38:** Gá 26:31-33

itó Zosé keí izóipo itó Salomé nene makó minamó.
⁴¹ * Keza amunaló Izesú nene Galilaia mikasiuka noigo ámegetiki nivake izamuha hiziki minamó neve. Kezagi itó Izesugegi Zelusalega itina vená lugáa mukímagi neneló minamó.

Izesuni gale zitamó

(Mat 27:57-61; Luk 23:50-55; Zon 19:38-42)

⁴² Únaká huluvaló nene holisi gamenamámíni netá ali vavá iaká a gamena alitokago, holisi gamenama alitokago, gamena hamó ha nego,
⁴³ Alimataia numutotí ve Zosehé eza monó kansole vete agika itiake a vémo áisi Ómasímo gizapa ve napa ale utó oketati gamenamú gizapa oko mina vémo ahelele vizimó ze hitoake Izesuni gonosiváa alinogo Pilatoni nene loká omikago, ⁴⁴ Izesú mota hilihe loko agata losi geleake, ami vetini gizapa vema sele loake, mota hilihe loko loká otamó.
⁴⁵ Loká omikago, ami vetini gizapa vemámíni gakó geleake, gonosivámú nene Zosehé hanuva aleko vitive loko gele amimó. ⁴⁶ Gele amekago, Zosehé nene gonosiváa asapú otatikumú lavolavo gó mokoná lamaná meina hizeake gonosiváa nene zalotí apasoko ale mikasiló oake, gó mokoná lamanámagú asapú omiake aleko vike meikú geha mulí goló vateikamó nenegú molomiake, gehani napa makó ahelú oko geha mulilímíni agepaló ze lí imó. ⁴⁷ Nenegú nomolago, Maliá eza Magatala numutotí vená itó Maliá makó Zoseni izolaho nene áminaló ániigi minasimó.

* **15:41:** Luk 8:2-3

16

Izesú heleneikutí otimó

(Mat 28:1-8; Luk 24:1-12; Zon 20:1-10)

¹ Ho lemekago, holisi mota asú okave liki li-ake, Magatala numutotí vená Maliá, itó Maliá makó Zemusini izolaho, itó Salomé keza Izesuni gonosiváaló anuva lamanaki uveli holotatune liki anuva uveli meina hizemó. ² Hiziki aliake, holisi napa Sategú nene gó lomolomo gonosi apakú viki nanitego, ho itimó. ³ Lá okago, vake gonosi apató ali alitiake kezáini ligili hagili ake geha mulí agepalotí gehani napama nene éaho ale ámegeletative. ⁴ Liki ligili hagili iake ánígamó nene, ámina gehani napa mota ahelú o ámegekago gale koló onoigo ánígamó. Ánígiake, ⁵ geha mulikú itiake ánígamó nene, gosohá ve makó nene luhoaká gó mokoná hána luhoake zamagaloka noigo, ánígiake ininá goha amó. ⁶ Ininá niago, eza láa loko lo kimimó: Lekeza ininá amilo. Lekeza nene Nasalete ve Izesuni zohota zaló apiliki apate vema ániganiganiahe. Imanegú noamíve. Mota otekave. Gonosiváa milita apáma ánigalo. ⁷ * Itó ánígiiki viki Pitage itó izegípala zuha lugáamagi láa liki li kimilo: Amunaló lo likimimómámmini oko goí o lekemeko Galilaia mikasiuka mota vokanazo, lekeza neneloka aí ániganigave liki li kimilo. ⁸ Loko lokago, luvoluvo nizeke ininá anazo, hetoka limiake geha mulikutí golisi vamó. Ololu liki vake kehelele vizekago, vegená makó avetó iki li kememamó.

Izesú Magatala apatotí Maliatoka utó o amimó
(Zon 20:11-18)

* **16:7:** Mat 26:32; Mak 14:28

[⁹ Izesú nene lelí holisi Sategú nene neteká holugú galegutí oteake, Magatala numutotí vená Maliá eza holosi golesa 7-a agikagutí kepeleko kimisele ámegeta vená nene ganá utó o amimó. ¹⁰ Lá okago, eza vike agivelagini nene miluma maluma nigeleke ive nama iki niago aveté oko lo kimimó. ¹¹ Heleneikutí oteake hanuva noigo ánigokuve loko lo kemekago, giliake gili zagemamó.

*Izesú izegipala losiloka utó o kimimó
(Luk 24:13-35)*

¹² Nenelotí keikutí ve lositá nene gihisigú ni-vasigo, Izesú nene ametameni haitolímíni ale luhoake utó o kimimó. ¹³ Lá okago, keza atiginá iki taoniloka vasike vegená lugáa aveté iki li kemesimóza, gakó lasimó nene gili zagemamó.

*Izesú aposolo 11 monó hozaló kimisilimó
(Mat 28:16-20; Luk 24:36-49; Zon 20:19-23)*

¹⁴ Alika Izesú nene izegipala 11 kezáikó alegesá iki nosánetá niki niago, utó o kemeake eza galegutí oteake noigo aí ániga vegenalitini gakó gili zagemamó nenazo, gili alévolé amakumú itó kigika hize lí ikumú nene gahá kimimó. ¹⁵ * Lá ike láa loko lo kimimó: Lekelisi nene numutó namató ho noititoka nolimitoka viki vegená mukitó niamó nene není gakó lamaná li kimilo. ¹⁶ Lá ikiko gili alévolé iiki monó nagamí hilinita vegená nene okulumalímíni mututoni itamóza, gili alévolé amita vegená nene meinímíni mututoni inigave. ¹⁷ Itó imane anosa nene gili alévolé iki minata vegenatoka utó oketanogo ive. Není nugulizá iki

* **16:15:** Apo 1:8

holosi golesa nene kipiliki kimisilinigave. Haitó konokutí galinali linigave. ¹⁸ Gosihá nene gopa ali otiki minatamó itó gipe nagamí gopa natamó nene nenémo kelémo golesa aminogo íve. Kivisiti ve-gená nene kigizanitunú nónohá zikitatamó nene zokanigave, loko limó.

Izesú okulumakú itimó
(Luk 24:50-53; Apo 1:9-11)

¹⁹ Láa loko Guivahani Izesú lo kemekago, Ómasímo alémoko okulumakú itekago, eza Ómasímini agizani lamagaloka minamó. ²⁰ Lá noigo, keza izegipala zuha nenete numutó namató viake gakola li utó iki li nikemego, Guivahani nenémo kelémo vatí ike ámina anosa utó o kimitunú nene keí gakó hize lé oketamó.]

lxxxv

Monoq Gotola Gosohaq
The New Testament in the Alekano (Gahuku)
Language of Papua New Guinea
Nupela Testamen long tokples Alekano (Gahuku) long
Niugini

Copyright © 1973, 1986 Bible Society of Papua New Guinea

Language: Alekano (Gahuku) (Alekano or Gahuku)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 11 Nov 2022 from source files dated 9 Oct 2020

44bc4c3c-532b-5251-95bd-2c3cfdce78ba